









John Carter Brown.













Harper No. 112.



# RELATION

DE CE QVI S'EST PASSE'

DE PLUS REMARQVABLE

AVX MISSIONS DES PP.

de la Compagnie de IESVS

EN

LA NOUVELLE FRANCE,

és années 1657. & 1658.



A PARIS,

Chez SEBASTIEN CRAMOISY, Im-  
primeur du Roy & de la Reine.

---

M. DC. LIX.

AVEC PRIVILEGE DV ROT.



# RELATION

DE LA PREMIERE PARTIE

DE LA MISSION DES PERES

DE LA COMPAGNIE DES PERES

DE LA MISSION DES PERES

DE LA MISSION DES PERES

DE LA MISSION DES PERES

DE LA MISSION DES PERES

DE LA MISSION DES PERES

DE LA MISSION DES PERES

DE LA MISSION DES PERES

DE LA MISSION DES PERES

DE LA MISSION DES PERES

DE LA MISSION DES PERES

DE LA MISSION DES PERES

DE LA MISSION DES PERES

DE LA MISSION DES PERES

DE LA MISSION DES PERES


DE LA MISSION DES PERES

DE LA MISSION DES PERES

DE LA MISSION DES PERES

DE LA MISSION DES PERES





## AVANT-PROPOS.

**C**EVX qui s'interessent dans la conuersion des Sauvages de la Nouvelle France, seront bien-aïses de lire, en cette Relation, quelques Chapitres, tirez des lettres, & des memoïres, qu'on a enuoyez cette année; mais non pas en si grand nombre que nous attendions. Les chemins sont si longs, & si incertains, sur la mer, & sur la terre, que c'est quasi vn petit miracle, quand rien ne s'égare, & ne se perd, des choses qui nous sont adressées. Le peu qu'on a receu, fait voir que le Demon prenoit quelque grand bien dans ces contrées pour la gloire du Fils de Dieu, puisqu'il continuë ses persecutions, & ses tempestes de tous costez. Aussi-tost que nous auons eu les armes en la main, c'est à dire la con-

## AVANT-PROPOS.

noissance des Langues pour le combattre, & pour faire connoistre IESVS-CHRIST : aussi-tost les Demons se sont opposez. Ils ont suscité d'horribles calomnies contre nous : on nous a pris pour des Imposteurs, pour des Sorciers, pour des Magiciens, pour des Gens qui faisoient geler, & mourir les bleds; qui empoisonnoient les rivières, qui causoient les maladies, & qui tuoient les hommes. On nous a en suite massacrez, on nous a bruslez, grillez, rostis, & mangez tout vifs. On a fait le mesme traitement aux Neophytes, qui avoient receu IESVS-CHRIST. Cette fureur continuë tous les iours contre nous : mais quoy? venit hora, vt omnis qui interficit vos, arbitretur obsequium se præstare Deo: L'heure, & le temps est venu, qu'on croir rendre un bon service à Dieu, de nous persecuter. Non est discipulus super magi-



## AVANT-PROPOS.

strum, nec seruus super dominum suum: sufficit discipulo, vt sit sicut magister eius, & seruo sicut dominus eius. *Le disciplen'est pas plus grand que son maistre, ny le valet que son seigneur. Ce nous est vne grande gloire, de porter les liurées de nostre Chef, & de nostre Capitaine: mais entrons en discours.*



---

## TABLE DES CHAPITRES.

Chap. I.	<b>D</b> <sup>V</sup> retour de nos Peres & de nos François du païs des Onnontagueronnons.	1
	<i>Lettre du Pere Paul Ragueneau, au Reuerend P. Iacques Renault Provincial de la Compagnie de Iesus en la Prouince de France.</i>	9
Chap. II.	De l'industrie & du courage de nos François dans leur retraite d'Onnontagué.	20
	<i>Lettre du P. Paul Ragueneau au P. Procureur des Missions de la Companie de Iesus en la Nouvelle France.</i>	22
Chap. III.	Journal de ce qui s'est passé entre les François & les Sauvages.	29
Chap. IV.	Continuation du Journal.	44
Chap. V.	Diuers chemins du Canadas à la mer du Nord. Les noms de plusieurs Nations nouvellement decouuertes.	70
	<i>Chemins à la mer du Nord.</i>	74
	<i>Noms de plusieurs Nations decouuertes depuis peu.</i>	79
Chap. VI.	De la mort d'une ieune Huronne Religieuse Hospitaliere.	88
Chap. VIII.	De la diuersité des actions, &	



## Table des Chapitres.

<i>'des façons de faire des François, ou des Europeans, &amp; des Sauvages.</i>	103
<i>Chap. VIII. Quelques nouvelles arrivées par le dernier vaisseau.</i>	130

---

### *Permission du R. P. Prouincial.*

**N**OVS IACQUES RENAULT,  
Prouincial de la Compagnie de  
IESVS en la Prouince de France, a-  
uons accordé pour l'auenir au sieur  
SEBASTIEN CRAMOISY, Mar-  
chand Libraire, Imprimeur ordinaire  
du Roy & de la Reine, Directeur de  
l'Imprimerie Royale du Louure, Bour-  
geois & ancien Escheuin de cette ville  
de Paris, *l'Impression des Relations de la  
Nouvelle France.* Donné a Paris au mois  
de Decembre 1658.

Signé, IACQUES RENAULT,



*Extrait du Priuilege du Roy.*

**P**AR grâce & Priuilege du Roy, il est permis à SEBASTIEN CRAMOISY, Marchand Libraire luré en l'Vniuersité de Paris, Imprimeur ordinaire du Roy & de la Reine, Directeur de l'Imprimerie Royale du Louure : Bourgeois & ancien Escheuin de Paris, d'imprimer ou faire imprimer, vendre & debiter vn Liure intitulé, *La Relation de ce qui s'est passé en la Mission des Peres de la Compagnie de IESVS au pais de la Nouvelle France és années 1657. & 1658.* & ce pendant le temps & espace de dix années consecutiues ; avec defenses à tous Libraires, Imprimeurs, & autres, d'imprimer, ou faire imprimer ledit Liure, sous pretexte de déguisement ou changement qu'ils y pourroient faire, aux peines portées par ledit Priuilege. Donné à Lion au mois de Decembre 1658. Signé, Par le Roy en son Conseil.

RELATION





# RELATION

DE CE QVI S'EST  
passé en la Mission des Pe-  
res de la Compagnie de  
I E S V S aux pais de la Nou-  
uelle France, depuis l'Esté  
de l'année 1657. iusques à  
l'Esté de l'année 1658.

---

*Du retour de nos Peres & de nos  
François du pais des Onnon-  
tagueronnons.*

## CHAPITRE I.

**E**N CORE qu'il soit vray que  
les Iroquois soient subtils,  
adroits, & de grands fourbes;  
ie ne sçauois neantmoins  
me persuader qu'ils ayent tant d'esprit

2 *Relation de la Nouvelle France,*

& tant de conduite , & qu'ils soient si grands politiques , que pour perdre les François , les Hurons , les Algonguins , & leurs Alliez, ils se soient servis des ruses & des intrigues qu'on leur impute.

Ils ont pressé plusieurs années avec des instances incroyables, avec des témoignages d'une affection tres-particuliere, & mesme avec des menaces de rupture & de guerre , si on méprisoit leur amitié , & si on rebutoit leur demande : ils ont, dis-je , pressé & prié que pour marque de paix & d'alliance avec eux, vn bon nombre de François montast en leur país , les vns pour les instruire , & les autres pour les protéger contre leurs ennemis.

Les Agneronnons voulant trauerser ce dessein , ils se sont battus les vns contre les autres , iusques à souiller la terre de sang & de meurtre. Quelques-vns croyent que tout cela se faisoit par feinte , pour mieux cacher leur ieu : mais il me semble que le ieu n'est gueres agreable, où il y va du sang & de la vie ; ie doute fort que la politique Iroquoise puisse al-



ler iusques là, & que des Barbares qui ont peu de dependance les vns des autres, puissent cacher si long-temps leurs intrigues.

Je croy plustost que les Iroquois Onnontagueronns demandoient des François avec sincerité, mais les vns avec des veuës bien differentes des autres. Les Anciens se voyant engagez dans de grandes guerres contre quantité de Nations qu'ils auoient prouoquées, demandoient des Hurons, comme des gens qui pouuoient grossir leurs troupes; ils souhaitoient des François pour tirer d'eux des armes à feu, & pour raccommoder celles qui se romperoient. De plus. Comme les Agneronns les traitoient quelquesfois assez mal, lors qu'ils passioient par leurs Bourgades pour aller trafiquer avec les Hollandois; ils vouloient sortir de cette dependance, en ouurant le commerce avec les François. Ce n'est pas tout, les armes estant journalieres, ils demandoient que nos François fissent vn grand Fort en leur pais, pour leur seruir de retraite, ou du moins à leurs femmes & à leurs enfans, en cas

#### 4 *Relation de la Nouvelle France,*

que leurs ennemis les pressassent de trop près. Voilà les veuës des politiques Iroquois. Le commun peuple ne penetrait pas si auant : la curiosité de voir des étrangers venus de si loing , l'esperance d'en retirer quelque petit emolument leur donnoit enuie de les voir : mais les Hurons Chrestiens & captifs parmy ces peuples , & ceux qui approuuoient leur vie , & les discours qu'ils tenoient quelquefois de nostre creance , ne respiroient rien tant au monde que la venuë des Predicateurs de l'Euangile, qui les auoient engendrez à Iesus-Christ.

Mais si-tost que les Capitaines & les Anciens se sont veus maistres de leurs ennemis, ayant dompté toutes les Nations qu'ils auoient attaquées ; si-tost qu'ils ont creu que rien ne pouoit plus resister à leurs armes, le ressouuenir des torts qu'ils pretendent auoir autrefois receus des Hurons, la gloire de triompher des Europeans , aussi-bien que des Americains , leur a fait prendre la resolution de se venger des vns , & de perdre les autres ; si bien qu'à mesme temps qu'ils virent la nation de Chat



*ès années 1657. & 1658.*

5

qu'ils redoutoient, subiuguée par leurs armes, & par les forces des Sonnon-toueronns leurs Alliez, ils auroient fait main-basse sur tous les François d'Onnontagué, n'estoit qu'ils preten-doient se servir d'eux, comme d'une amorce pour attirer quelques Hurons, & les massacrer comme ils ont fait. Et si dès lors la consideration de quelques-vns de leurs gens qui estoient demeurez à Kebec, ne les eust arre-sterz, le chemin d'Onnontagué eust seruy de tombeau aux François, aussi-bien qu'aux Hurons, comme il se ver-ra cy-aprés. Depuis ce temps-là nos Gens ayant découuert leur conspira-tion, & reconnu que leur mort estoit conclüe, penserent à leur retraite, dont il sera parlé dans la lettre sui-vante.



6 *Relation de la Nouvelle France,*

*Lettre du Pere Paul Ragueneau , au  
Reuerend Pere Iacques Renault  
Prouincial de la Compagnie de Ie-  
sus en la Prouince de France.*

*Pax Christi,*

**M**ON R. PERE,

La presente est pour informer V. R. que nous voilà de retour de la Mission des Iroquois , chargez de quelques dépouilles remportées sur l'Enfer. Nous portons entre nos mains plus de cinq cens enfans , & quantité d'adultes, pour la pluspart morts après le Baptisme. Nous auons rétably la Foy & la pieté dans les cœurs d'une pauvre Eglise captiue , dont nous auons ietté les premiers fondemens au païs des Hurons. Nous auons publié l'Evangile à toutes les nations Iroquoises; de sorte que deormais elles seront sans excuse , & Dieu sera pleinement iustifié sur elles au grand iour du Jugement.

Le Diable enragé de nous voir fai-



re vne si belle moisson, & iouir si pleinement des fruits de nostre entreprise, s'est seruy de l'inconstance des Iroquois, pour nous chasser du centre de ses Estats: car ces Barbares, sans autre suiet que pour suiure leur humeur volage, ont repris la guerre contre les François, dont les premiers coups ont esté déchargez sur nos bons Chrestiens Hurons, qui montoient avec nous à Onnontagué, sur la fin de l'Esté dernier, & qui furent cruellement massacrez entre nos bras, & dans nostre sein, par la plus insigne trahison qui se puisse imaginer. Ils firent en suite leurs pauvres femmes captiues, & mesme en bruslerent quelques-vnes à petit feu, avec leurs enfans de trois & quatre ans.

Cette sanglante execution a esté suiuite du meurtre de trois François à Montreal, par les Onneioutchronons, qui enleuerent leurs cheuelures, & les porterent comme en triomphe dans leurs bourgades, pour marque de guerre declarée.

Ce coup d'hostilité barbare ayant obligé Mr Dailleboust, comman-

## 8 *Relation de la Nouvelle France;*

dant pour lors en ce païs, de faire arr<sup>e</sup>ster & mettre aux fers à Montreal, aux trois Riuieres & à Quebec, vne douzaine d'Iroquois, qui pour lors s'y estoient rencontrez, partie Onnontagueronnons, & la pluspart Agnieronnons. L'une & l'autre nation Iroquoise fut irritée de cette detention de leurs gens, pretendant qu'elle estoit inique : & pour s'en venger cruellement, ils conuoquerent vn conseil secret, où ils formerent le dessein d'une guerre implacable contre les François : toutesfois ils iugerent à propos de dissimuler pour quelque temps, iusques à ce que par le renuoy du Pere Simon le Moyne, qui estoit pour lors à Agniegué, ils eussent obtenu la deliurance de leurs Gens, qui estoient aux fers; faisant leur compte qu'incontinent après ils déchargeroient les premiers coups de leur fureur sur nous autres François qui estions à Onnontagué, au nombre de cinquante à soixante, engagez au cœur de leur païs, comme dans vne prison, d'où ils croyoient qu'il nous estoit impossible de sortir.

Ils eurent mesme la veuë dans ce



és années 1657. & 1658. 9

Conseil, qu'en nos personnes ils auroient de précieux ostages, soit pour retirer par échange ceux de leurs Gens qui estoient dans nos prisons, soit pour obtenir tout ce qu'il leur plairoit, lors qu'à la veüe de nos habitations Françoises ils nous feroient sentir les effets de leur cruauté: & sans doute que ces spectacles pleins d'horreur, & que les cris lugubres de quarante & cinquante François innocens auroient touché de compassion, & auroient mis en peine le Gouverneur & les habitans de quelque place que ce fust.

Nous ne sçauions ces mal-heureux desseins des Iroquois que dans le secret: mais nous voyions ouuertement leurs esprits preparez à la guerre; & des le mois de Feurier diuerfes bandes se mettoient en campagne pour cét effet, 200. Agnieronnons d'une part, 40. Onneiottchronons d'une autre, & quelques troupes d'Onnontagué auoient desia pris le deuant, pendant que le gros de l'armée s'amasseroit.

Nous ne pouuions pas esperer, humainement parlant, pouuoir tirer de ces dangers qui nous environ-

10 *Relation de la Nouvelle France,*

noient de toutes parts, vne cinquantaine de François qui nous auoient confié leurs vies, & dont nous nous sentions responsables deuant Dieu & deuant les hommes. Ce qui nous mettoit plus enpeine, n'estoit pas tant les feux dans lesquels vne partie de nos François deuoient estre iettez, comme la captiuité malheureuse à laquelle plusieurs d'entre-eux estoient destinez par les Iroquois, & où le salut de leurs ames estoit bien plus à plaindre, que la perte de leurs corps. C'est ce que la plupart apprehendoient plus viuement, qui se voyant desia comme captifs, souhaitoient les coups de hache, ou mesme les feux, plustost que cette captiuité. Ils estoient mesme resolu, pour n'en venir à ce malheur extreme, de tenter tout, & de s'enfuir chacun de son costé dans les bois, ou bien pour y perir de faim & de miseres, ou tacher de se rendre à quelqu'vne des habitations Françoises.

Dans ces desseins si precipitez nos Peres & moy, & vn gentilhomme nommé Monsieur du Puys, qui commandoit tous nos François, avec vne



garnison de dix Soldats, ( dont neuf estoient desia d'eux-mesmes resolu de nous abandonner ) nous iugeasmes qu'il valoit mieux se retirer de compagnie, ou pour s'entr'animer les vns les autres à la mort, ou mesme pour la vendre plus cher.

Pour cela il falloit partir sans qu'on en eust aucun vent: car le moindre soupçon qu'eussent eu les Iroquois de nostre retraite, eust hasté sur nous le malheur que nous voulions fuir. Mais comment esperer de pouvoir partir sans estre decouverts, estant au centre du pais, & tousiours obsedez de quantité de ses barbares, qui ne delo-geoient point d'auprés de nostre maison, pour espier nostre contenance en cette conioncture? Il est vray qu'ils ne pensoient pas que nous eussions iamais eu le courage d'entreprendre ce coup, sçachans bien que nous n'avions ny canots, ny matelots, & que nous ignorions les chemins bordez de precipices, où vne douzaine d'Iroquois nous pouvoient defaire aisément: outre que la saison estoit insupportable dans la froideur des eaux

12 *Relation de la Nouvelle France,*

glacées, où toutefois il falloit traifnier les canots, se iettant à l'eau, & y demeurant les heures entieres, quelquefois iufques au col; & iamais nous n'auions entrepris de telles expéditions, fans auoir des Sauuages pour nous conduire.

Nonobstant ces obstacles qui leur paroiffoient, auffi bien qu'à nous, infurmontables. Dieu qui tient entre fes mains tous les momens de nos vies, nous inspira fi heureufement tout ce qu'il falloit faire, qu'estant partis le 20. iour de Mars de nostre maison de fainte Marie, proche d'Onnontagué, sur les onze heures de nuit, fa diuine Prouidence nous conduifant comme par vn miracle continuel, au milieu de tous les dangers imaginables, nous arriuasmes à Quebec le 23. du mois d'Auril, ayant passé par Montreal, & par les trois Riuieres, auant qu'aucun canot eust pû y estre mis à l'eau, la riuiere n'y ayant pas esté libre pour la nauigation que le iour mefme que nous y parusmes.

Toutes les habitations Françoises nous regardoient comme des person-



nes venuës de l'autre monde , & ne pouuoient assez admirer la bonté de Dieu , qui d'un costé nous auoit miraculeusement deliurez d'un si euident peril , & d'autre part auoit tiré de peine tous les François de Montreal, des trois Riuieres, & de Quebec, qui se sentoient quasi obligez de supporter des Iroquois des choses insupportables , & ne pas reprimer les excès de leurs insolences , de peur que le contre-coup n'en retombast sur nous , qui estions en proye & à la discretion de l'ennemy commun.

Et certainement il estoit bien temps d'arriuer ; car nous apprismes à Montreal , que deux-cent Agnieronnons venus en guerre , estoient proche de là : & mesme par les chemins nous en auions apperceu les pistes , & veu des feux de quelques bandes détachées , qui nous eussent fait vn mauvais party , si nous n'eussions hasté nostre marche.

Quelques-autres troupes ennemies parurent aussi aux trois Riuieres , & y firent prisonniers trois ieunes hommes qui ne faisoient que d'en sortir pour

14 *Relation de la Nouvelle France,*

aller au trauail, sans que l'on peust leur donner aucun secours, quoy que les Iroquois les entraînassent à la veuë de tous ceux du bourg.

A Quebec. Le mesme ennemy s'est fait voir dans les campagnes voisines: il a tué du monde quasi dans nos portes, il s'est jetté sur de pauvres femmes Algonquines, qui y furent surprises en plein midy; les vnes tuées sur la place, & les autres emmenées captiues, que toutesfois l'on recouura; nos François, les Hurons, & les Algonquins ayant pouruiuy l'ennemy, & luy ayant coupé chemin: mais les meurtriers s'échapperent, disparoissant au moment qu'ils paroissent lors qu'ils se sentent les plus foibles. Ce sont des renards en leurs approches, ils attaquent en lions, & disparoissent en oiseaux faisans leur retraite.

Nous nous reconnusmes encore plus obligez à remercier Dieu d'une protection si particuliere sur nous, lors qu'estant arriuez à Quebec, nous auons appris de diuers endroits, tant de quelques Hurons venus d'Anniegué, où ils estoient captifs, que de quelques-autres



venus d'Onnontagué; que le dessein des Onnontagueronnons auoit esté de massacrer tous nos François, dès lors qu'ils arriuerent en leur pais l'année 1656. mais que l'exécution en auoit esté différée iusques à l'année suiuiante, après que les Hurons y auroient esté attirés par nostre moyen, sur lesquels l'on deuoit exercer la mesme cruauté: en sorte que tout le bon accueil que l'on auoit fait à nos Peres & à nos François depuis leur arriuée à Onnontagué, n'auoit esté qu'une suite de ce dessein perfide, & une fourbe des Anciens & des Capitaines Iroquois, qui conduisoient secretement cette trahison, dans l'esperance qu'ils auoient, que si nous estions satisfaits de leur procedé, les Hurons restez à Quebec, croiroient qu'il n'y auoit rien à craindre pour eux à Onnontagué, & que pour lors y montant sur cette creance, l'on feroit les femmes & les enfans captifs, & l'on massacrerait les hommes. C'est ce qui fut exécuté cruellement sur nos bons Chrestiens Hurons, qui montoient avec nous à Onnontagué, le troisieme iour

16 *Relation de la Nouvelle France,*  
d'Aoust de l'année dernière 1657.

Que si pour lors nous ne fûmes pas enuoloppez dans ce cruel massacre, ce fut vne providence de Dieu, en ce qu'il y auoit cinquante Onnontagueronnons qui estoient descendus à Quebec, pour y aller querir le reste des Hurons qui n'auoient pas voulu monter avec nous, ayant pressenty le malheur qui nous arriua. Ces cinquante Onnontagueronnons nous sauuerent la vie sans y penser, pource que leurs compatriotes vouloient attendre leur retour, auant que d'exercer en nostre endroit ce dernier acte d'hostilité. Cette mesme Prouidence qui veilloit amoureusement sur nous, ne permit pas que ces cinquante Onnontagueronnons retournassent en leur pais, auant que la nouuelle y fust arriuée, des Iroquois que l'on arresta & qu'on mit au fers à Montreal, aux trois Riuieres, & à Quebec, l'année passée 1657. Ce qui suspendit tous leurs mauuais desseins sur nous; Dieu cependant nous les ayant fait connoistre, & nous ayant donné le courage, les forces & les moyens pour  
nous

nous retirer heureusement de la captivité où nous estions , au milieu de ce peuple barbare & ennemy.

Ce n'est pas d'aujourd'huy que les desseins de Dieu sont adorables sur ses élus , & qu'il trouue sa gloire par des voies toutes opposées aux nostres , dont les ressorts ne paroistront que dans l'éternité. Car outre les victimes de nos Peres , qui estoient toutes prestes d'estre immolées , & à qui Dieu n'a pas voulu mettre le feu , quoy que l'Iroquois en eust desia préparé le buscher ; les sentimens des Chrestiennes Huronnes furent vraiment Chrestiens à la mort de leurs maris & de leurs peres , dont le sang reiallissoit sur elles , aussi-bien que sur nous.

Grand Dieu , s'écrioit l'une , mêlez mon sang avec celui de mon mary : qu'on m'arrache aujourd'huy la vie ; iamais l'on ne me pourra arracher la foy que j'ay au cœur.

Mon Dieu , disoit une autre , ie croy fermement que vous estes le Tout-puissant , quoy que ie voie vos seruiteurs massacrez par vos ennemis ;



18 *Relation de la Nouvelle France,*

vous n'avez pas promis que nostre foy nous exempteroit de la mort : nos esperances sont pour vne autre vie : il faut mourir en terre , pour viure dans le Ciel.

Comme on massacroit vne de ces femmes fortes , nommée Dorothee , à coups de haches & de cousteaux , à l'entrée du bourg d'Onnontagué ; voiant les larmes d'une petite fille de huit ans , qui auoit esté au seminaire des Vrsulines , elle luy dit : Ma fille , ne pleures pas ny ma mort , ny la tienne ; nous irons aujourd'huy de compagnie au Ciel : Dieu y aura pitié de nous à toute eternité : les Iroquois ne pourront pas nous raur ce grand bien. Puis en mourant elle s'écria : I E S V S , aiez pitié de moy. Et sa fille fut tuée sur l'heure mesme à coups de cousteaux , prononçant les mesmes paroles que sa mere auoit dites : I E S V S , aiez pitié de moy.

Deux autres estant brûlées à petit feu , s'écrioient au milieu des flammes , qu'elles mouroient Chrestiennes , & qu'elles s'estimoient heureuses que Dieu les vist dans leurs tourmens,

és années 1657. & 1658. 19

& qu'il connuſt leur cœur. Oüy, diſoit l'vne; ſi nos corps eſtoient immortels, les Iroquois rendroient nos peines immortelles: puis que nos ames ne peuvent pas mourir, eſt-ce choſe incroyable que Dieu, qui n'eſt rien que bonté, doive les recompenser à toute éternité?

Ces meres embraſſoient leurs enfans qu'on avoit iettez dans ces flammes, & l'excès de toutes ces cruantez barbares ne pût jamais les ſeparer: tant il eſt vray que la foy & l'amour de Dieu ſont plus forts que le feu & la mort.

C'eſt dans le Ciel, où nous verrons plus pleinement, les reſſorts adorables & aimables de la providence de Dieu, ſur ceux qu'il a choiſis au milieu de cette barbarie pour en faire des Saints. Nos Eglises ſont vraiment ſouffrantes, & le Diable y fait ſes ravages: mais Dieu en tirera ſa gloire en dépit de l'Enfer. C'eſt à nous de faire ce que nous pourrons: c'eſt à luy ſeul de faire ce qu'il luy plaira. De V. R.

De Quebec ce 21.  
d'Aouſt 1658.

*Le tres-humble & obéiſſant  
ſerviteur en N. S.*

PAVL RAGVENEAY.

B ij

*De l'industrie & du courage de nos  
François dans leur retraite  
d'Onnontagué.*

## CHAPITRE II.

**L**E Pere Iean De Brebeuf, le Pere Gabriel Lallement, le Pere Isaac Iogues, & les autres, pour la pluspart, qui ont esté brûlez & mangez par les Iroquois, pouuoient assez facilement échapper des mains & de la dent de ces anthropophages ; mais le Sacrement de Penitence qu'ils vouloient administrer à quelques Neophytes deuant leur mort, & le Baptisme qu'ils vouloient conferer à quelques Catechumenes, leur firent preferer les feux & la rage des Iroquois, à la douceur de la vie. C'estoit fait de tous nos Peres, & de tous nos Freres d'Onnontagué, s'ils se fussent trouuez en vn pareil rencontre : mais voiant que leur mort seroit inutile à vne pauvre Eglise captiue qu'ils abandonnoient, & que leur esclavage ne les auroit pas



soulagez , dautant que ces barbares les deuoient lier & garotter , & les mener à Kebec , pour retirer en contre-échange leurs compatriotes , que nos François retiennent dans les fers. Voiant , dis-ie , que leur mort , & leur captiuité seroit plus nuisible que profitable à la Colonie Françoisse , ils prirent resolution de se sauuer , & de travailler à la conseruation des François , qui s'alloient perdre en se diuisant , & en se separant les vns des autres.

La resolution prise , il falloit trouuer les moiens de l'executer. Il est plus aisé de donner des preceptes , que de les garder. Nos François n'eurent pas de peine à se resoudre de conseruer leurs vies , & d'euitier leur mort : les glaces , les vents , en vn mot , l'impossibilité de partir les arresterent iusques à la veille du iour destiné à leur massacre : pas vn ne doutoit qu'il ne fallust faire retraite , & au plustost. Voions maintenant comme ils s'y prirent : la Lettre suiuant nous le decouurira.

22 *Relation de la Nouvelle France,*

*Lettre du Pere Paul Ragueneau au  
Pere Procureur des Missions de la  
Compagnie de Iesus en la Nouvelle  
France.*

**M**ON R. PERE, *Pax Christi.*

V. R. sera bien-aïse d'apprendre les particularitez de nostre départ de sainte Marie des Iroquois, pour ioin- dre ses actions de grâces à celles que nous deuons a la Bonté diuine, qui nous a retirez avec bien des merueil- les d'un lieu, où son amour ne nous auoit pas conduit sans quelques pro- diges. Nous deuions perir en mon- tant, la mort nous attendoit à nostre arriuée; nostre départ a tousiours pas- sé pour impossible; & neantmoins *ecce* *uiuimus*, nous sommes pleins de vie, & nous auons eu le bon-heur de mettre en possession de la vie eternelle quan- tité de ceux qui se preparoient à boire nostre sang, & ietter nos corps tout viuans dans leurs feux.

La résolution estant prise de quitter ces terres, où Dieu auoit pris par no-

estre moien, le petit nombre de ses éleus, les difficultez paroissoient insurmontables dans l'exécution, pour laquelle toutes choses nous manquoïent.

Pour suppleer au defaut des canots, nous auions fait, en cachette, deux batteaux, d'une nouuelle & excellente structure, pour passer les rapides; ces batteaux ne tiroient que fort peu d'eau, & portoient beaucoup de charge, quatorze ou quinze hommes chacun, & la valeur de quinze à seize cent liures pesant. Nous auions de plus quatre canots à l'Algonquine, & quatre à l'Iroquoise, qui deuoient composer nostre petite flotte de cinquante trois François.

Mais la difficulté estoit de faire l'embarquement sans estre apperceus des Iroquois, qui nous obsedoient continuellement. Le transport des batteaux, des canots, & de tout l'équipage ne pouuoit pas se faire sans vn grand bruit: & neantmoins, sans le secret, il n'y auoit rien à esperer, qu'un massacre general de tous tant que nous estions, au moment que l'on se fust apperceu que nous eussions eul



24 *Relation de la Nouvelle France,*  
moindre pensée de nous retirer.

Pour cela, nous inuitasmes tous les Sauvages qui estoient proche de nous, à vn festin solemnel, où nous emploiasmes toute nostre industrie, & n'épargnasmes ny le son des tambours, ny les instrumens de musique, pour les endormir par vn charme innocent.

Celuy qui presidoit à la ceremonie, ioüia son ieu avec tant d'adresse & de bon-heur, qu'un chacun vouloit contribuer à la ioie publique : c'estoit à qui ietteroit des cris plus perçans, tantost de guerre, tantost d'allegresse: les Sauvages par complaisance chantoient & dansoient à la Françoisise, & les François à la Sauvage. Pour les animer de plus en plus à ce beau ieu, on distribua des presens à ceux qui ioüoient mieux leur personnage, & qui menoient plus de bruit, pour étouffer celuy qu'une quarantaine de nos gens faisoient au dehors, dans le transport de tout nostre équipage. Tout l'embarquement estant fait, le festin se finit à point nommé, les conuiez se retirent, & le sommeil les aiant bien-tost abattus, nous

fortifmes de nostre maison par vne porte de derriere , & nous ambarquasmes à petit bruit , sans dire Adieu à nos Sauvages , qui faisoient les fins , & qui pensoient nous amuser iusques au temps de nostre massacre , de belles apparences , & par des témoignages de bonne volonté.

Nostre petit Lac , sur lequel nous voguions en silence dans les tenebres de la nuit , se geloit à mesure que nous auacions , & nous faisoit craindre d'estre arrestez dans les glaces , après auoir euté les feux de l'Iroquois. Dieu nous en deliura pourtant , & après auoir auancé la nuit , & tout le iour suiuant par des precipices & par des cheutes d'eau effroiables ; enfin nous nous rendismes le soir dans le grand Lac Ontario , à vingt lieuës du lieu de nostre depart.

Cette premiere iournée estoit la plus dangereuse ; car si les Iroquois eussent apperceu nostre sortie , ils nous eussent coupé chemin ; & n'eussent-ils esté que dix ou douze , il leur estoit facile de nous mettre en desordre , la riuere estant tres-étroite , &

*26 Relation de la Nouvelle France,*  
terminée , après dix lieuës de chemin , d'un precipice affreux , où nous fusmes obligez de mettre pied à terre , & porter l'espace de quatre heures nostre bagage & nos canots , par des chemins perdus , & couverts d'une Forrest épaisse qui eust seruy de Fort à l'ennemy , & d'où à chaque pas il eust pû nous assommer , & tirer sur nous sans estre apperceu.

La protection de Dieu nous accompagna visiblement dans tout le reste du chemin , y marchant dans des perils qui nous faisoient horreur après les auoir eutez , & n'ayant point la nuit d'autre giste que sur la neige , après auoir passé les iournées entieres dans les eaux & parmy les glaces.

Dix iour après nostre départ , nous trouuasmes le Lac Ontario, sur lequel nous voguions, encore gelé en son emboucheure : il fallut prendre la hache en main pour fendre la glace , & se faire passage : mais ce fut pour entrer deux iours après dans vne cheute d'eau , où toute nostre petite flotte se vit quasi abismée. Car nous estant engagés dans vn grand fault , sans le



connoistre, nous nous trouuâmes au milieu de ses brisans, qui par le rencontre de quantité de gros rochers, éleuoient des montagnes d'eau, & nous iettoient dans autant de precipices, que nous donnions de coups d'auirons. Nos batteaux qui à peine auoient demy-pied de bord, se trouuerent bien-tost chargez d'eau, & tous nos gens dans vne telle confusion, que leur cris meslez avec le bruit du torrent nous faisoient voir l'image d'un triste naufrage. Il falloit pourtant pousser outre, la violence du courant nous emportant malgré nous dans de grandes cheutes, & par des chemins où iamais on n'auoit passé. La crainte redoubla à la veüe d'un de nos canots englouty dans un brisant, qui barroît tout le rapide, & qui estoit neantmoins la route que tous les autres deuoient tenir. Trois François y furent noiez, un quatrième aiant échappé heureusement, s'estant tenu attaché au canot, & aiant esté secouru au bas du fault, lors qu'il estoit sur le point de lascher prise, les forces luy manquant quasi avec la vie,

28 *Relation de la Nouvelle France,*

Ceux qui furent noiez auoient communie ce iour là, & s'estoient saintement disposez à la mort, sans sçauoir qu'elle fust si proche. Mais Dieu qui connoist ses éleus, les y auoit amoureuxment preparez. Ce nous est vne consolation de pouuoir dire, *Pater, quos tradidisti mihi, non perdidisti ex eis quemquam.* Car ces trois noiez estant au Ciel, ne sont perdus qu'heureusement, aiant trouué Dieu & leur salut dans leur perte.

Le 3. d'Auril nous abordasmes à Montreal au commencement de la nuit : les glaces n'en estoient parties que le iour mesme, & elles nous eussent arresté, si nous fussions arriuez plustost. Nous nous vismes obligez de seiourner au mesme lieu quatorze iours, les Riuieres qui estoient plus bas n'estant pas encore déprises.

Le 17. d'Auril nous nous rendismes aux trois Riuieres, d'où les glaces n'estoient parties que le iour precedent. nous y passasmes la Feste de Pasques.

Le Mardy nous arriuasmes heureusement à Québec ; vn iour plustost nous n'eussions pas pû y aborder, tout

n'y estoit qu'un pont de glace depuis la coste de Lauson, d'où on auoit encore trauerfé la Riuiere à pied sec le iour de Pasques.

Vraiment l'Ange de Dieu nous conduisoit dans nos démarches, & dans nos demeures, comme il conduisoit autrefois son peuple bien-aimé au sortir de la captiuité d'Egypte, du milieu des Nations barbares. Louëz Dieu avec nous de ce qu'il nous a deliurez d'une seruitude bien plus dangereuse, après auoir beny nos trauaux par le salut de quantité d'ames, qui ioüissent maintenant du repos eternal.

---

*Journal de ce qui s'est passé entre les  
François & les Sauvages.*

### CHAPITRE III.

**O**UTRE les deux Lettres couchées aux deux Chapitres precedens, nous en auons receu quelques autres, & quelques memoires, qui composeront ce Journal.



30 *Relation de la Nouvelle France,*

- Le mot Onnonta, qui signifie vne montagne, en langue Iroquoise, a donné nom à la Bourgade appelée Onnontaé, ou, comme d'autres la nomment, Onnontagué, pource que elle est sur vne montagne, & les peuples qui l'habitent, s'appellent en suite Onnontaeronnons, ou bien Onnontagueronnons. Ces peuples ayant long-temps & instamment demandé, qu'on enuoyast quelques Peres de nostre Compagnie en leur país. Enfin
1655. l'année 1655. le Pere Ioseph Chaumot & le Pere Claude Dablon leurs furent accordez. Ils les embarquerent le 19. de Septembre, & les rendirent à Onnontagué le 5. Nouembre de la mesme année 1655.
1656. L'année suiuiante 1656. ces deux bons Peres se voyant écoutez avec applaudissement, & avec bienueillance, le Pere Dablon quitta Onnontagué le second iour de Mars, pour venir demander du secours à Kebec, où il arriua au commencement d'Auril, & en partit le 17. de May, en compagnie de trois Peres & de deux Freres de nostre Compagnie, & de bon nom-

bre de François, qui tirerent tous vers ce nouveau país, où ils se rendirent le 11. iour de Iuillet de la mesme année 1656.

L'an 1657. la moisson paroissant <sup>1657.</sup> belle dans toutes les Bourgades des Iroquois superieurs, le commun peuple écoutant les bonnes nouvelles de l'Euangile avec simplicité, & les Anciens avec vne feinte bien cachée; le Pere Paul Ragueneau, le Pere François Du Peron, quelques François, & plusieurs Hurons partirent de Montreal le 26. de Iuillet, pour aller secourir leurs freres & leurs compatriotes.

Le 3. iour du mois d'Aoust de la mesme année 1657. la perfidie des Iroquois commença à se découvrir, par le massacre qu'ils firent des pauvres Hurons qu'ils menoient en leur país, après mille protestations de bienveillance, après mille sermens à leur mode, qu'ils les traiteroient comme leurs freres. Et si quantité d'Iroquois ne fussent demeurez parmy les François auprès de Kebec, pour rascher d'emmenner avec eux le reste des Hurons, qui se deffians de ces traistres, ne s'estoient

32 *Relation de la Nouvelle France,*

pas voulu embarquer avec les autres; c'estoit fait dès lors & des Peres, & des François qui montoient avec eux; & bien-tost après, tous ceux qui demeuroient sur les riués du Lac Ganantaa, proche d'Onnontagué, auroient couru la mesme fortune: mais la crainte que les François ne se vengeassent sur leurs compatriotes, arresta leur dessein, dont nos Peres eurent secretement connoissance, incontinent après leur arriuée dans le país. Vn Capitaine mesme qui sçauoit le secret des Anciens, aiant pris quelque goust aux Predications de l'Evangile, & se voiant fort malade, demande le Baptême, l'ayant receu après vne suffisante instruction, il découurit les mauuais desseins de ses compatriotes à celuy qui luy conféra, & peu de temps après il s'en alla au Ciel.

Le 9. du mesme mois d'Aoust, vingt Iroquois Agneronnons aborderent à Quebec: c'estoit à qui entraîneroit en son país, les restes de la pauvre Nation Huronne: les Iroquois d'en-haut & d'embas, les attiroient avec les plus belles promesses  
du



du monde, & ils n'auoient tous que des intentions de les perdre.

Le 11. parut la barque de Monsieur Bourdon, lequel estant descendu sur le grand Fleuve du costé du Nord, vogua iusques au 55. degré, où il rencontra vn grand banc de glaces, qui le fit remonter, aiant perdu deux Hurons, qu'il auoit pris pour guides. Les Eskimaux Sauvages du Nord, les massacrerent, & blessèrent vn François de trois coups de fleches, & d'vn coup de cousteau.

Le 21. quelques Hurons s'estant ioints avec les Agneronnons, dont nous venons de parler, s'embarquerent à Kebec, pour aller demeurer en leur pais, ignorant la captiuité qui les attendoit.

Le 26. Le Pere le Moine les suiuit, avec quelques autres Hurons, remenant vn ieune Iroquois Agneronnon, qui estoit passé en France, & que nous auions renuoïé à Kebec, où on le rappelloit.

Le 3. de Septembre, les Onnontagueronnon, qui estoient demeurez à l'entour des habitations Françoises,

34 *Relation de la Nouvelle France,*

enuoierent deux de leurs Gens vers les Hurons de Kebec, pour les presser de prendre Onnontagué pour leur patrie, leur donnant mille assurances, qu'ils seroient les tres-bien venus. C'estoit, comme j'ay dit, à qui auroit le debris de ce pauvre peuple. Or iagoit qu'ils ne sceussent pas ce qui estoit arriué à leurs freres, ils tascherent neantmoins de faire trouuer bon à ces Deputez, de remettre la partie iusques au Printemps suiuant. Ce fut vn coup de Dieu: car ce dilaïement obligea plusieurs Iroquois de passer l'Hyuer auprès des François, pour attendre les Hurons; ce qui empescha les Onnontagueronnons de mettre à mort, ou de se saisir de nos Gens, qui estoient en leur pais. Dieu leur vouloit donner, par cette prouidence si particuliere, le moien de se sauuer.

Le 9. du mesme mois de Septembre. Nos Peres d'Onnontagué enuoièrent deux canots, pour donner nouuelle à Kebec, du massacre des pauvres Hurons Chrestiens, mis à mort par vne trahison inouïe de ces Barbares, comme nous l'auons mar-

qué cy-dessus au 3. d'Aoust de l'an 1657. Ils deuoient aussi rendre des Lettres, qui expliquoient l'estat du païs, & qui découuroient la mauuaise volonté des principaux de ces peuples vers les François. Nous en mîmes quelque chose à la fin de la Relation de l'an passé. Les Onneioutchronons aiant eu le vent de l'enuoy de ces deux canots, les deuancerent à dessein, comme on a sceu depuis, de massacrer ceux qui les conduisoient, & de ietter leurs Lettres au feu: mais nos Gens aiant euité leurs embusches & leurs poursuites, arriuerent enfin à Kebec

Le 6. d'Octobre, non sans l'étonnement de nos François. Je vous laisse à penser, si les pauvres Hurons, qui n'auoient pas voulu suiure les Onnontagueronnons, benissoient Dieu, de se voir deliurez des pattes de ces loups. A peine y auoit-il vn mois, que ces mal-heureux les auoient voulu trahir. S'il faut auoir de l'esprit pour estre fourbe, ces peuples n'en manquent pas.

Le 16. Vne chaloupe porta nou-



36 *Relation de la Nouvelle France,*

uelle à Kebec, que deux François auoient esté pilléz au Cap à l'arbre par des Iroquois. Ces Barbares, sous ombre qu'ils auoient de nos Gens en leur païs, commettoient quantité d'insolences, pillant des maisons, tuant les bestiaux des metairies Françoises. Les habitans s'en estant plains fort souvent. Enfin

Le 21. du mesme mois, Monsieur Dailleboust, qui commandoit pour lors, fit assembler les principaux, pour voir quel remede on pourroit apporter à ces desordres. Il fut arresté, 1. Qu'il ne falloit point commencer les premiers à irriter les Iroquois, mais qu'on pouuoit sans difficulté, *vim vi repellere*, repousser par la force leurs insultes. 2. Qu'on deuoit tousiours traiter comme amis les Hurons & les Algonquins nos Alliez. 3. Qu'il falloit empescher que les Iroquois, soit d'en-haut ou d'embas, ne leur fissent aucun tort à la veuë de nos habitations.

Le mesme iour, il fit assembler les Algonquins, & les Hurons, qui luy demanderent, comme ils se compor-

teroient enuers les Iroquois : il repartit. Qu'ils les pouuoient attaquer, & les combattre hors la veuë des habitations Françoises. Que nous les protegerions dans cette étendue, & que nous ne romperions iamais la paix, s'ils ne faisoient les premiers quelque acte d'hostilité.

Le 25. du mesme mois d'Octobre. Quelques Iroquois Onneiotchronnons, voisins d'Onnontagué, tuèrent trois François à Montreal, à coups de fusil; arracherent à deux la peau de la teste, & l'emporterent en triomphe en leur país. A l'occasion de ces meurtres, Monsieur de Maisonneufue fit arrester, & mettre aux fers vn Sauuage Onnontagueronnon, qui depuis quelque temps chassoit en l'Isle de Montreal, & se retiroit le plus souvent avec les François.

Le 29. Trois Onneiotchronnons se presentent au Fort de Montreal, demandent à parler à Monsieur de Maisonneufue Gouverneur. Ils protestent qu'ils sont innocens, & qu'ils sont tres-marris de l'attentat commis sur ses Gens. L'un deux tire sept pre-

sens, composez de neuf colliers de porcelaine, avec ces paroles: *l'essuie le sang répandu sur la natte, ou sur la terre, où ie suis. l'ouure ta bouche, afin de bien parler. Je calme ton esprit irrité par ce mauvais coup. Je couure la terre souillée de sang, & i'enferme dans l'oubly cette meschante action. Je te fay sçauoir, que c'est l'Qïogueronnon qui t'a tué. Je te donne vn breuuage, pour te guerir. Je raffermis le May ébranlé, auprès duquel se doiuent tenir les Conseils des Iroquois & des François.* Monsieur de Maisonneufue receut les presens, n'ayant pas encore assez de lumiere sur la déloyauté de ces perfides, qui paroïssioient fort innocens. Il les inuita neantmoins de demeurer quelque temps auprès de nos François, pour reconnoistre de plus près leurs démarches. Mais comme ils se sentoient coupables, & qu'ils estoient camarades (à ce qu'on croit) de ceux qui auoient massacré nos Gens, voiant d'ailleurs vn Sauvage Onnontagueronnon aux fers, ils s'enfuirent la nuit à la fourdine.

Le 11. iour de Novembre. Le canot que Monsieur de Maisonneufue auoit



enuoié à Monsieur Dailleboust, pour luy donner aduis de ces meurtres, parut à Kebec, aiant passé par les trois Riuieres. A mesme temps Monsieur Dailleboust commande, qu'on arreste en toutes les habitations des François, tous les Iroquois qui s'y presenteroient, de quelque endroit qu'ils püssent estre. On auoit desia commencé d'arrester douze Agneronnons aux trois Riuieres, dont vne partie fut enuoiée à Kebec.

Le 3. du mesme mois. Quelques Algonquins estant allez chasser, & faire la petite guerre vers les Isles de Richelieu, tuèrent vn Sauvage Onnontagueronnon, qu'ils rencontrerent, & en apporterent la cheuelure à Kebec. Son compagnon s'estant échappé, se retira à Montreal, où il fut mis aux fers.

Le 5. Monsieur Dailleboust assembla les François & les Sauvages nos Alliez, pour leur declarer le dessein qu'il auoit, d'enuoier deux Agneronnons de ceux qu'on luy auoit enuoiés des trois Riuieres, pour informer Ondesonk, c'est à dire, le Pere Le Moi-

40 *Relation de la Nouvelle France,*

ne, qui estoit au bourg d'Anié, ou, comme d'autres l'appellent, Aniegué, pour l'informer qu'on auoit tué trois François à Montreal, & qu'en suite on auoit retenu quelques Iroquois Agneronnons en nos habitations. Voicy sommairement les paroles, qui deuoient estre portées aux Anciens du país. 1. Qu'on a tué trois François à Montreal; les meurtriers estoient trente, quoy qu'il n'en parust pas tant. 2. Que les parens des defunts se vouloient venger sur les Agneronnons, qui vinrent aux trois Riuieres, bien-tost après que la nouvelle de ce massacre y fut apportée. 3. Qu'on s'est opposé à cette vengeance de la part d'Onontio, c'est à dire, du Gouverneur des François. 4. Qu'on les a arrestez seulement, sans leur faire aucun mal. 5. Qu'on est resolu de les retenir, pendant le voiage de ceux qu'on enuoie de sa part, pour se plaindre aux Anciens du país de cet attentat, & pour sçauoir s'il n'a point esté commis par leur iu nesse. 6. Qu'on les assure, que ceux qu'on a retenus, seront bien traitez;

& afin qu'on n'en doute point, Onontio écrit tous ces articles à Ondefonk, & les a nettement expliquez aux Agneronnons, qu'on a mis en liberté, pour aller traiter cet affaire.

Le 7. du mesme mois de Novembre. Deux Agneronnons partirent de Kebec, & en prirent vn troisiéme aux trois Riuieres, pour s'en aller porter ces paroles en leur país. On leur donna force lettres de diuers endroits, pour donner au Pere Le Moine, dont vne partie deuoient estre enuoyée à nos Peres & à nos François d'Onnontagué, par l'entremise des Agneronnons, qui vont souuent en ce país-là.

Enuiron ce mesme temps, ou vn peu deuant, Monsieur de Maisonneufue renuoia aussi vn prisonnier Onnontagueronnon en son país, pour rendre des lettres à nos Peres, qui les informoient de tout ce qui se passoit parmy les François. Il donna charge à ce Barbare, de dire à peu près aux Anciens d'Onnontagué, ce qu'on mandoit à ceux d'Aniegué; mais il y eust de l'infidelité des deux costez.

Il est vray que les Agneronnons



42 *Relation de la Nouvelle France,*

rendirent fidellement les lettres à Ondefonk, pource qu'ils craignoient qu'on ne fist du mal à leurs Gens detenus par les François. Mais pour les lettres qui s'adreissoient à nos François d'Onnontagué, l'Agneronnon qui les portoit, les ietta dans la riuere, ou les presenta, comme il est croiable, aux Anciens du pais : mais ces bonnes gens, qui se vouloient défaire des Predicateurs de l'Euangile, & de ceux qui les assistoient, les ietterent dans le feu.

L'Onnontagueronnon enuoié par Monsieur de Maisonneufue fit encore pis : car il dit aux principaux de sa Nation, que les François s'estoient liez principalement avec les Algonquins, pour leur faire la guerre, & qu'ils auoient tué son camarade. C'estoit vn Algonquin qui l'auoit mis à mort, allant en guerre, comme nous l'auons marqué au 3. de Nouembre. Il n'en falloit pas dauantage pour animer ces furieux, qui auoient desia conclud la mort de quelques-vns, & la capriuité des autres. Ils voulurent neantmoins agir de concert avec les Agneron-

nons, qui ne pouuoient non plus que les autres, goustier la detention de leurs Gens, la croiant tres-iniuste.

Nos pauures François estoient cependant bien étonnez, de n'apprendre aucune nouuelle asseurée ny de Kebec, ny des trois Riuieres, ny de Montreal. Ces Barbares leur auoient entierement interdit ce commerce: si bien que les ordres de Monsieur Dailleboust ne furent point rendus à Monsieur Du Puis, qui commandoit les Soldats, ny aucune lettre à qui que ce fust des François.

Le 17. du mois de Novembre de la mesme année 1657. Parut à Kebec vne chaloupe pleine de Sauuages, qui apporta nouuelle, que plus de soixante canots chargez de pelteries, estoient abordez aux trois Riuieres. Ils venoient de la Nation des poissons blancs, & d'autres peuples encore plus éloignez du grand Fleuve, dont quelques-vns n'auoient iamais veu ny François, ny Europeans. Ils estoient enuiron trois ou quatre personnes en chaque canot, tous gens bien-faits, & de belle taille.

*Continuation du Journal.*

## CHAPITRE IV.

**I**E ne sçay pas en quel temps les trois Agneronnons enuoiez par Messieurs Dailleboust, arriuerent au bourg d'Anniegué. Je ne sçay non plus ny le iour, ny le mois de l'arriuée de l'Onnontagueronnon delegué par Monsieur de Maisonneuve à Onnontagué : mais je sçay bien que

Le 3. de Ianuier de cette année 1658. trois Agneronnons, differens des trois qu'on auoit renuoiez, apporterent à Kebec des lettres du Pere Ondesonk, c'est à dire, du Pere Le Moine, dont voicy l'abbregé.

Premierement. Les trois Agneronnons, dit-il, qui vous vont voir, portent trois presens à Onontio, c'est à dire, à Monsieur le Gouverneur, qui signifient ces trois paroles, qu'ils vous déduiront eux-mesmes. Ce sont les Anciens qui parlent par leur bouche, & qui vous disent : 1. Nous auons esté



tuez en la personne des François, que nous venons enterrer. 2. Ondesonk est viuant; il est chez nous aussi libre qu'il seroit chez vous. 3. Nous venons requerir nos neveux detenus entre vos mains.

Secondement. Le Pere adioûte, que deux cent Agneronnons estoient partis pour s'en aller, en chassant, vers Tadoussac, & qu'au Printemps ils deuoient faire des canots vis à vis de ce quartier-là, sur l'autre riuë du grand Fleuve, qui a bien dix lieües de largeur en cet endroit, pour surprendre en suite tous les Montaignets & les Algonquins, qui retournent ordinairement de leur grande chass. en ce temps-là. Les deux principaux Capitaines de cette troupe se nomment Aouigaté & Anguieout.

En troisiéme lieu, vne autre bande de 400. Soldats est aussi partie pour s'aller joindre aux Iroquois d'en-haut, & pour faire avec eux vn gros d'environ 1200. hommes, afin d'entrer dans le pais des Outaouak, & tirer vengeance de la mort de trente de leurs Gens, qui furent tuez en guerre, il y a enui-

46 *Relation de la Nouvelle France,*

ron vn an, dans ces contrées fort éloignées des Iroquois. Tcharihoguen est General de cette petite armée.

En quatrième lieu. Il dit que les trois Ambassadeurs ne sont que de ieunes gens, qui deuoient aller en guerre avec les autres; mais qu'on les a détachez de leur gros, & qu'on les a enuiez à Kebec, pour retirer les prisonniers des mains des François: & qu'il n'y a plus dans les bourgs de l'Agneronnon que des vieillards, toute la ieunesse estant partie dès le mois de Ianuier pour la guerre; si bien que si leurs ennemis paroissent, qu'ils détruiroient tout leur païs.

En cinquième lieu. Il déplore la calamité des pauvres Hurons, qui s'estant confiez à ces perfides, les ont fuius dans leur païs, où ils sont traitez comme des esclaves. Le mary est separé de sa femme, les enfans de leurs peres & meres; en vn mot, ils seruent de bestes de charge à ces Barbares. C'est vn aduis aux Hurons qui restent, & qui demeurent encore parmi les François, pour ne se pas fier aisément aux Iroquois, s'ils ne veulent perdre

le corps & l'ame. Voilà sommairement le contenu des lettres, que le Pere Le Moine écriuit à nos Peres de Kebec. Venons maintenant à ce qui se fit publiquement, en suite de la venue de ces Ambassadeurs, dont le plus âgé n'auoit pas plus de trente ans, les deux autres paroissoient quasi des enfans.

Le 1. iour de Feurier. Monsieur Dailleboust assembla les François, & puis après les Sauvages, pour leur communiquer les nouuelles apportées par ces trois Iroquois, à qui on donna audience

Le 4. iour du mesme mois. Le plus âgé des trois tira neuf colliers de porcelaine assez beaux. Il en présenta sept à Onontio; & deux aux Sauvages nos Alliez, avec ces paroles. 1. Onde sonk est en vie, il se porte bien, il loge dans nos cabanes. 2. Les Iroquois & les Hollandois sont liez d'une chaisne de fer, leur amitié ne se peut rompre; voilà pour faire entrer Onontio dans ce lien. 3. Nous ne sçauons pas qui a tué les François à Montreal: c'est bien le Sonnotoueronnon, ou l'Onnonta-



48 *Relation de la Nouvelle France,*

gueronnon, ou l'Onneiotchronnon ; mais nous ne sçauons pas lequel des trois : nous sçauons seulement que ce n'est pas l'Agneronnon. 4. Je me réioüis fort de voir mes freres en vie, voilà pour en témoigner ma ioie & mon contentement. 5. Et pour marque que je les voudrois bien voir en mon païs, ie vous fay ce present. Au fixième present il dit: Ce collier seruira de marteau, pour rompre leurs fers, & pour les mettre en liberté. 7. Et cet autre, fournira les besoins necessaires pour leur retour. 8. Pour toy, Algonquin & Huron, ce que i'offre te fera sçauoir que mon cœur est tousiours en bonne assiette : dis-nous en quelle posture est le tien ? 9. Voicy vn obstacle, pour empescher que tu ne me blesse en la maison d'Onontio : cache ta hache & ton couteau, si tu en as, car tu luy ferois honte en me blessant. Ce petit abbregé de la harangue d'un Barbare fait voir que l'esprit ne leur manque pas, mais bien l'education, & la connoissance du vray Dieu.

Le 5. de Feurier. Monsieur Daille-  
bouft

bouft tint vne afsemblée de François, & en l'Ifle il fit venir les Hurons & les Algonquins, & dans ces deux afsemblées fut arresté, ce qu'on devoit répondre à ces trois Ambassadeurs, ou Messagers. Monsieur Dailbouft fit écrire la réponse, & la donna à son interprete, qui la rapporta publiquement, comme ie vay dire.

Le 12. du mesme mois, les François, les Algonquins, & les Hurons, s'estant rendus dans vne grande Salle, les trois Agueronnons s'y trouuerent; le Truchement François leur parla à peu près en ces termes, s'accommodant au genie & aux coustumes du país.

C'est chose étonnante que, toy Agneronnon, tu ne m'estimes qu'un enfant. Si ie te parle, tu fais semblant de m'écouter. Tu me traites comme si i'estois ton captif, t'imaginant que tu me tuëras, quand tu voudras. Tu ne me mets pas au nombre des hommes: tu me prens pour vn chien. Quand on frappe vn chien, il crie, il s'enfuit, & si on luy presente à manger, il reuient, & flatte celuy qui l'a frappé

Toy Agneronnon , tu me tuës ; moy qui suis François , ie crie , on m'a tué , & tu me iettes vn collier de porcelaine , comme en me flattant , & en te mocquant. Tay-toy , me dis-tu , nous sommes bons amis. Sçaches que le François entend bien la guerre : il tirera raison de ta perfidie , qui dure depuis vn si long-temps. Il ne souffrira plus que tu le méprises. Il n'y a qu'un mot qui serue. Fay satisfaction , ou dis qui a fait le meurtre. Je ne répondray plus à tes paroles. Tu n'agis pas en homme : tu ne gardes aucune de tes promesses. Je sçay bien que ton armée est en campagne : tu l'as dit , passant à Montreal , à l'Onnotagueronnon : tu l'as dit à tes compatriotes , qui sont detenus aux Trois Rivières. Et cependant tu crois m'amuser avec vn collier de porcelaine. Le sang de mes freres crie bien haut : si bien-tost ie ne suis appaisé , ie donneray satisfaction à leurs ames. D'où vient qu'Ondefonk ne paroist point icy : c'est luy que ie demandois , & non pas son écriture , qui est desia si vieille , que ie ne la connois plus ? Tu es si ef-



fronté, que tu oses bien redemander quelques haches, & quelques hailions qu'on a pris à quelques-vns de tes Gens. As-tu rapporté ce que tes compatriotes ont pillé? ce que vous avez volé depuis deux ans dans les maisons Françoises? Quittes tes trahisons: faisons la guerre, si tu ne veux la paix: le François ne sçait que c'est de craindre, quand vne fois il est resolu à la guerre.

Tu demandes à l'Algonquin & au Huron, ce qu'ils ont dans le cœur. Ton frere l'Onnontagueronnon à tué les Hurons, & tu venois pour massacrer les Algonquins, & tu leur demandes ce qu'ils ont dans le cœur? Ils souffrent que ie te conferue la vie, pource qu'ils m'obeïssent; & n'estoit qu'ils me respectent, le collier dont tu leur as fait present, auroit seruy de licol pour t'étrangler. Vn Capitaine Algonquin aioûta ce peu de paroles. Tu dis que tu n'as pas oüy parler de la mort des François: penfes-tu que nous soions si enfans de croire, que tu n'as pas veu leurs cheuelures, que tes Gens ont porté dans leur païs? Vous

52 *Relation de la Nouvelle France,*  
ne faites qu'une cabane de cinq feux,  
tous tant que vous estes, & tu n'aurois  
pas regardé ces trophées? Ondesonk  
t'a fait voir ton neveu, qu'Onontio &  
moy t'auons renuoié : en as-tu dit vn  
seul mot de reconnoissance? *il parle*  
*du ieune iroquois pris en guerre par vn*  
*Algonquin, qui le donna à Monsieur de*  
*Lauson Gouverneur du païs, lequel l'en-*  
*uoia en France, où ayant demeuré quelque*  
*temps, il repassa à Kebec l'an 1657. &*  
*de là fut reconduit en son païs par le Pere*  
*le Moine, comme nous auons dit cy-dessus.*

L'Algonquin poursuiuit son dis-  
cours. Au reste, mon frere, (dit-il à  
l'Agneronnon) ne t'étonnes point de  
voir tes Gens aux fers : Onontio qui  
est nostre Pere, nous y fait bien met-  
tre, quand nous nous sommes en-  
yurez.

Pour conclusion. L'Agneronnon  
voiant que le Conseil se dissipoit, &  
qu'on ne parloit point de le renuoyer  
en son païs, fit encore deux presens.  
Au premier, il dit. Je ne connois point  
le meurtrier des François. J'ay appris,  
passant à Montreal, que c'estoit l'On-  
neiotchronnon, ou l'Oïogueronnon :

mais si tu voulois , Onontio , que deux ou trois de nous autres allassions porter nouvelle à nos Anciens , de l'estat de nos affaires , tu verrois au Printemps Ondesonk , & les meurtriers. Au second present. En attendant ( fit-il ) la pleine & entiere satisfaction pour ces meurtres , i'essuie , par auance , le sang des morts répandu sur la terre. Changeons de propos.

Pendant qu'on faisoit ces assemblées à Kebec , & qu'on tenoit ces Conseils , les Agneronnons en tinrent vn fort secret , au mois de Feurier , où vn petit nombre des principaux & des Anciens de toutes les Nations se trouuerent , dans lequel il fut resolu , qu'aussi-tost qu'on auroit retiré les Agneronnons & les Onnontagueronnons , qui estoient entre les mains des François , on feroit mainbasse sur ceux qui estoient proche d'Onnontagué ; & que si Onontio ne relaschoit point ces prisonniers , on tuëroit vne partie des robes noires , & des François , & on mettroit l'autre dans les liens , pour en faire échange avec leurs compatriotes mis aux fers



54 *Relation de la Nouvelle France,*

dans les prisons Françoises.

On m'a assuré, que deuant l'assemblée de ce Conseil general des Nations Iroquoises, il s'en estoit tenu vn particulier dans Onnontagué, où la mort de nos Peres & de nos François auoit esté concludë; & l'exécution s'en deuoit bien-tost faire, si vn Capitaine, grand amy de nos Peres, ne l'eust arrestée par adresse, disant, qu'il ne falloit pas se precipiter; qu'on nous égorgeroit bien, quand on voudroit; que nous ne pouuions pas échapper; qu'il falloit attendre le retour de la ieunesse, qui estoit allée en guerre, pour faire le coup avec plus d'assurance, & avec moins de danger & de perte.

Quelles estoient, ie vous prie, les pensées de nos pauvres Peres, à qui ces nouuelles se disoient en secret? A quoy se pouuoient resoudre cinquante-trois François, se voyant environnez d'ennemis de tous costez, apprenant tous les iours, que diuerses bandes, & diuerses troupes descendoient vers les François, pour les massacrer, aussi-bien que nos Sauvages.

On m'a dit aussi ( ie ne sçay s'il est  
vray, pource que ie n'ay pas receu tous  
les memoires que i'attendois. ) Que  
nos Peres firent des presens aux An-  
ciens d'Onnontagué, pour empescher  
ces entreprises; mais ils répondirent,  
qu'ils ne pouuoient pas retenir leur  
ieunesse.

On dit encore, que les meurtriers  
des trois François de Montreal, estant  
interrogez, pourquoy ils auoient at-  
taquez les François, puisque la paix  
estoit faite avec eux? répondirent en  
se mocquant. Les François tiennent  
entre leurs bras les Hurons & les Al-  
gonquins, il ne faut donc pas s'éton-  
ner, si en voulant frapper les vns, les  
coups tombent quelquefois sur les  
autres.

Enfin nos François ont recours à  
Dieu. La crainte des feux & de l'es-  
clavage les pensa diuiser, mais *incidit*  
*illis consilium bonum*: ils s'vnirent tous  
ensemble, & prirent vn bon conseil.  
Si bien que

Le 20. de Mars, ils abandonnerent  
leur maison, comme nous auons dit  
au Chapitre second, & sortirent de ce

56 *Relation de la Nouvelle France,*

pauvre & miserable païs, seçotiant la poussiere de leurs pieds, & disant avec les Anges: *curauimus Babylonem, & non est sanata, derelinquamus eam.*

Le 25. Le Pere Ondefonk s'estant transporté des Bourgades Iroquoises en la Nouvelle Hollande, m'écriuit vne Lettre, qui m'a esté apportée de Dieppe, & renduë à Paris, au mois de Nouembre de cette année 1658. T'en ay tiré ce qui suit. Nos François d'Onnontagué ne sçauent bonnement, si nous auons la paix, ou la guerre: car la derniere bande de nos meilleurs Chrestiens Hurons, qui montoient volontairement avec eux, pour s'aller habituer au païs des Onnontagueronnons, où ils esperoient du secours pour leur Christanisme, furent tous massacrez cruellement au milieu du chemin, par les Barbares conducteurs, & ce à la face de leurs freres les François, qui ne s'attendoient pas peut-estre à meilleur marché.

Pour moy, on me croit mort à Kébec. Les probabilitéz qu'ils en ont, ne sont pas petites. Depuis mon arriuée à



Agniegué, il y a tantost cinq mois, il s'est fait à Montreal vn massacre de trois de leurs principaux habitans, les cheuelures de deux furent enleuez, & la teste du troisiéme. On a veu à Kebec, & aux trois Riuieres, des bandes des guerriers Iroquois, qui marchaient, disoient-ils, contre l'Algonquin. Dans ce doute Monsieur Dailleboust iugea, qu'il estoit du mieux d'en mettre vn bon nombre aux fers, qui y sont encore depuis cinq ou six mois.

Cette detention ma pensé causer la mort, & me voicy aujourd'huy avec les Hollandois, à la veille de me ieter dans vne barque, qu'ils équippent pour Kebec. De fait on me donne auis de tous pleins d'endroits, que l'Agueronnon ne m'a veu qu'à regret dans son païs, où j'assistois nos Hurons Chrestiens, depuis l'emprisonnement de ses gens.

Au reste nos pauures Algonquins, & d'enhaut & d'embas, courent aujourd'huy risque d'estre tous détruits, si Dieu n'y met la main : car l'Iroquois iouë de son reste. Il a quitté son païs

58 *Relation de la Nouvelle France,*

pour l'aller exterminer : vne partie est en campagne depuis deux mois , & ne doit estre de retour qu'à l'Automne prochain. Son dessein est d'enleuer la grande Bourgade des Hurons , & des Algonquins , où le defunt P. Garreau montoit , pour y faire vne belle Mission. L'autre bande partit dès mon arriuée en leur païs , à dessein d'aller renuerser tout ce qu'elle rencontrera soit au Sagné , soit à Tadoussac.

Est-il possible qu'une petite poignée de mutins , mette si long - temps vne barriere fatale à la propagation du saint Euangile ? & qu'ils sappent la subsistance de Canadas ? l'espere que Dieu, & nos SS. Anges y mettront la main. V. R. voit assez , *quid facio demum sit opus , sed opus est , mi Pater , festinato.*

De la Nouvelle Hollande  
le 25. Mars 1658.

*Totus in Domino Iesu*  
SIMON LE MOINE.

On voit bien en effet ce qu'il faudroit faire , mais ceux qui ont la bonne volonté , n'ont pas tousiours la puissance , & ceux qui ont le pouuoir , n'ont pas tousiours le vouloir. C'est en Dieu qu'il faut établir nostre esperance.

Rentrons au chemin que nous auons quitté.

Le 3. d'Auril. Nos Peres & nos François après mille dangers, arriuerent enfin à Montreal, où les glaces s'ouurirent, pour leur donner passage. Ils furent contraints d'y seiourner environ quatorze iours, à cause que le bas de la riuere n'estoit pas encore libre. Comme le pais des Iroquois est plus au Sud, que celuy des Algonquins, ils auoient trouué les lacs & les riuieres bien moins glacées. Montreal les receut avec vne grande charité.

Le 17. d'Auril. Ils parurent aux Trois Riuieres. On les regardoit comme des Gens échappez du feu, & de l'eau, & des glaces. Ils furent aussi obligez d'y faire quelque petit seiour, pour les mesmes difficultez du passage, la Riuere se débouchant plus-tard aux endroits qui sont plus au Nord.

Le 23. du mesme mois d'Auril. Ils mirent pied à terre à Kebec, où ie m'asseure que chacun raconta plus d'une fois ses auantures. Laissons-les entretenir leurs amis, & reprenons



60 *Relation de la Nouvelle France,*  
nostre Journal.

Nous auons veu cy-cessus , au 12. de Feurier de cette année 1658. comme les Ambassadeurs d'Aniegué promirent qu'on verroit au Printemps Ondefonk. En effet, il aborda à Mont-real, sur la fin du mois de May. Les Agneronnons, qui le conduisoient, aiant asseuré Monsieur de Maisonneuve, que ses compatriotes n'auoient point rompu la paix avec les François, il relascha à leur priere, & à celle du Pere, deux Agneronnons, qu'il auoit arrestez depuis peu. Passant aux Trois Riuieres, le Gouverneur de la place les fit embarquer dans vne chaloupe, avec cinq Agneronnons, qu'ils amenoient à Kebec à Monsieur Dailleboust.

Aussi tost on conuoqua vne assemblée de François, & de Sauvages nos Alliez, pour entendre ces nouueaux Messagers ou Ambassadeurs. Ceux qui s'y trouuerent, s'estant glissez en bon nombre, de la Sale du Chasteau, ou du Fort, dans vne gallerie qui regarde sur le grand Fleuve; cette gallerie estant bien caduque, ne se trouua pas

assez forte pour soutenir tant de monde, si bien qu'elle rompit, & tous les François, & les Sauvages, les libres & les captifs, se trouuerent pêle-mêle hors du Fort, sans auoir passé par la porte: personne, Dieu mercy, ne fut notablement endommagé. Chacun estant rentré, les harangues & les presens se firent à l'ordinaire. Je n'en ay point sceu le detail, les memoires ne sont pas venus iusques à moy. On m'a seulement dit, que la conclusion de ce Conseil fut, que ceux qui auoient amené le Pere le Moine, nommé par les Sauvages Ondefonk, s'en retourneroient en leurs païs avec des presens, & avec quelques prisonniers, pour inuiter les Anciens à venir voir Onontio, afin de conclure vne paix generale, & vniuerselle entre toutes les Nations. Qu'en attendant cela, on retiendroit tousiours vne partie des Agneronnons, & qu'on les traiteroit bien. Ils partirent de Kebec au mois de Iuin, ie ne sçay pas le iour precisément.

En ce mesme temps. Le Pere le Moine, qui auoit demeuré à Mont-

62 *Relation de la Nouvelle France,*

real , deuant que d'aller au païs des Agneronnons, y remonta, à la priere de deux bons & honnestes Ecclesiastiques qui y demeurent , & à l'instance des habitans , à ce qu'on m'a rapporté.

Dans le mesme mois de Iuin , vne bande d'Onneiotchronnons partis de leur païs, deuant que nos Peres & nos François fussent sortis du Lac de Ganantaa voisin d'Onnontagué , prirent trois François aux Trois Riuieres , qu'ils entraînerent avec eux en l'Isle de Montreal, où voulant surprendre quelques-vns de nos Gens , l'un d'eux fut tué : ce qui les irrita si fort , qu'ils bruslerét sur la place vn des trois François, qu'ils tenoient captifs , emmenât les deux autres vers leur païs , où l'on dit qu'ils les ont fait mourir à petit feu.

Le 11. de Iuillet. Arriua à Kebec Monsieur le Vicomte d'Argençon , enuoïé par sa Maïesté, & par Messieurs de la Compagnie de la Nouvelle France , pour gouverner le païs. Aussi-tost que son nauire eut mouillé l'ancre , Monsieur Dailleboust , qui tenoit sa place en attendant sa venuë,



l'alla saluër dans son abord, pendant que les habitans de Kebec estoient en armes sur le quay. Monsieur Dailleboust estant fortý, se met à la teste des habitans, & Monsieur le Gouverneur, après auoir enuoié son Secrétaire pour faire ses complimens, mit pied à terre avec ses gens. Ils montent tous en bel ordre au Chasteau. On luy presente les clefs à la porte. Le canon ioüant de tous costez, & dans le Fort, & sur les nauires, faisoit rouler son tonnerre sur les eaux, & dans les grandes forests du país. Aiant pris possession du Fort, il rend visite à nostre Seigneur en l'Eglise de la Paroisse, puis en nostre Chapelle, & en suite il se transporte à l'Hospital, & de là aux Vrsulines. Voilà vne belle iournée, voions la suiuite.

Le lendemain, qui estoit le 12. du mesme mois de Iuillet, comme il lauoit ses mains pour se mettre en table, on crie aux armes, on dit que les Iroquois tuënt quelques personnes, en vn lieu si peu éloigné, qu'on entendoit les voix des attaquans, & des attaques des maisons voisines. Mon-

64 *Relation de la Nouvelle France,*

sieur le Gouverneur quitte la compagnie & le disner, leue en vn moment 220. hommes, sans compter les Hurons & les Algonquins, qui se mirent de la partie. Il donne la chasse à ces coureurs, qui, pour se sauuer, abandonnerent deux enfans Algonquins, qu'ils emmenoient, après auoir laissé pour mortes trois pauvres femmes Algonquines, dont l'vne fut veritablement tuée sur la place, l'autre mourut quelque temps après de ses bleffures, & la troisiéme en est rechappée.

Le 13. Monsieur le Gouverneur partit à la pointe du iour, avec 250. hommes: mais après six heures de marche, ils ne trouuerent que la piste des Iroquois, qui s'estoient retirez; si bien que Monsieur le Gouverneur fut contraint de ramener ses gens, avec resolution de marcher en bon ordre, à toutes les nouvelles certaines qu'il aura des ennemis.

Le 28. Monsieur le Gouverneur aiant fait l'honneur à nos Peres, de visiter leur College, qui à la verité n'est pas si peuplé que celuy de Paris. Aussi Rome n'estoit pas si grande, ny

*és années 1657. & 1658.* 65

fi triomphante sous Romulus , que sous Iules Cesar. Mais enfin, pour petit qu'il soit , les écoliers ne laisserent pas de le receuoir en trois langues : ce qui luy agreea si fort , comme aussi vne grande troupe de François , & de Sauvages , qui se trouuerent en ce rencontre.

Le 1. du mois d'Aoust. Les Sauuages allerent saluër Monsieur le Gouverneur , & luy firent leurs presens , pour marque de leur ioie , & de l'esperance qu'ils ont d'estre deliurez , par son moien , des maux que leur font leurs ennemis. Monsieur le Vicomte leur fit compliment , & leur donna en suite vn festin à la mode du país.

Quelque temps après , sur l'aduis qu'il receut , que deux Iroquois étoient venus aux Trois Riuieres , faire quelque proposition au Sieur de la Porterie , & croiant , avec suiet , que c'étoient des auant-coureurs de quelque armée , qui venoient épier l'estat , la garde , & la contenance des habitans de ce lieu : il partit avec 150. François , & 100. Sauvages , monta iusques aux Trois Riuieres : mais voiant qu'il ne



66 *Relation de la Nouvelle France*,  
paroissoit rien , après auoir étably  
Gouverneur particulier de cette pla-  
ce Mr de la Poterie , il donne iusques  
aux Isles du Lac de S. Pierre, fait quel-  
que seiour dans l'ancienne place du  
Fort de Richelieu, & le vent ne luy  
permettant pas de monter la riuiera,  
pour aller iusques à Montreal, il re-  
tourne à Kebec avec toute sa milice.

Le 14. du mesme mois. Vne ving-  
taine d'Agneronnons estant vis à vis  
du Fort des Trois Riuieres, à l'autre  
bord du grand Fleuve, sçachant bien  
que Monsieur le Gouverneur y estoit  
arriué, descendirent la nuit vers Ke-  
bec, & après auoir rodé à la four-  
dine à l'entour de nos habitations,  
pour prendre quelque pauvre Hu-  
ron, ou quelque Algonquin, se iet-  
terent sur deux François au Cap Rou-  
ge; l'un estoit fils d'un habitant nom-  
mé Haiot, & l'autre estoit seruiteur  
de Monsieur Bourdon: ils les pille-  
rent, & les dépouillèrent, sans leur  
faire autre mal, pource qu'ils se sau-  
uerent de leurs mains par adresse.

Sur la fin d'Aoust, ces vingt chas-  
seurs d'hommes & de bestes remon-

terent en secret aux Trois Riuieres. Vn François en aiant apperceu quelques-vns, qui cherchoient leur proie à pas de larrons, coucha l'vn d'eux en iouë; mais vn ieune Iroquois le preuint, & luy tira vn coup de fusil dans le bras: comme il n'estoit pas loin du bourg, il se sauua. Ces Barbares ne croiant pas qu'il fust blessé, se diuiserent en deux bandes; dix se cachèrent dans l'épaisseur des bois, & les dix autres furent si temeraires, que de se venir presenter aux François, disant qu'ils venoient à la semonce d'Onontio, pour traiter d'une bonne paix generale.

Nous venons de remarquer cy-dessus, au mois de Iuin, que les Ambassadeurs Agneronnons, qui nous auoient rendu le Pere Ondefonk, auoient eu ordre de retourner en leur país, & de dire à leurs Anciens, qu'on ne relascheroit point leurs prisonniers, qu'ils ne vinsent eux-mêmes, pour traiter d'une paix generale entre toutes les Nations. Or soit que ces Ambassadeurs eussent rencontré en chemin ces vingt chasseurs ou guerriers, ou

que veritablement ils eussent fait leur rapport au païs, & que là-dessus ces vingt hommes se soient mis en chemin, pour venir traiter avec les François : il est certain qu'ils firent tous leurs efforts, pour prendre à la dérobée, tous les Hurons & tous les Algonquins, & peut-estre tous les François, qu'ils auroient pû attraper. Et comme ils se voioient en trop grand nombre, pour faire croire qu'ils venoient comme des Ambassadeurs, ils se diuiserent, & ne parurent que dix. Mais ils tomberent dans la fosse, qu'ils preparoient aux autres. Ils nous vouloient tromper, & ils furent trompez eux-mesmes : car celui qui commandoit aux Trois Riuieres, les fit prendre par adresse, & en enuoia sept à Monsieur le Gouverneur à Kebec.

Ces pauvres miserables penserent estre massacrez à leur abord par les Algonquins, mesme entre les mains des François, quoy qu'ils fussent plus de cinquante hommes bien armez, pour les conduire depuis le bord de la riuiera, iusques à vne tour, qui n'en est pas bien éloignée. Monsieur



le Gouverneur n'ayant pas encore decouvert sa pensée aux Algonquins, ils creurent qu'il vouloit deliurer ces prisonniers. C'est ce qui les fit entrer en furie contre eux, se souuenant des perfidies, des trahisons & des meurtres commis sur leurs pauvres compatriotes. Je croy qu'ils sont maintenant bien contens du procedé de Monsieur le Gouverneur, voiant qu'il prend à cœur les interets de la Foy de la Religion, & des Sauvages Chrestiens; & de tous nos Alliez.

Au reste, le Capitaine de cette bande d'Agneronnons se nomme en sa langue Atogoüaekoüan, & en Algonquin, Michtraemikoüan, c'est à dire, la grande cuillier. Si c'est celuy qui parut à Kebec, l'an 1645. pour traiter de paix avec Monsieur le Cheualier de Montmagny, c'est vn grand homme bien-fait, hardy, vaillant, fourbe, eloquent, railleur: ce sont les belles qualitez, qu'on remarqua en luy dès ce temps-là. Voilà en quel estat estoit le pais, le 6. de Sept. de cette année 1658. que le premier vaisseau leua l'ancre, pour retourner en France.

*Diuers chemins du Canadas à la mer  
du Nord.*

*Les noms de plusieurs Nations nouvel-  
lement découvertes.*

CHAPITRE V.

**P***ropter verba labiorum tuorum ego  
custodiui vias duras. S. Paul se pou-  
uoit bien approprier ce passage : car  
en verité les paroles de Iesus-Christ  
l'ont ietté dans des chemins bien ru-  
des & bien fascheux. Aussi-tost qu'il  
a commencé de prescher l'Euangile,  
d'établir l'Eglise, de procurer le salut  
des hommes , il n'a trouué par tout  
que des croix, dans la Iudée, dans la  
Grece, dans l'Italie : il n'a trouué que  
des calomnies, des persecutions, des  
perils & des dangers, sur mer & sur  
terre, des Iuifs & des Gentils : *pericu-  
lis fluminum, periculis latronum, pericu-  
lis ex genere, periculis ex gentibus, peri-  
culis in ciuitate, periculis in solitudine,  
periculis in mari, periculis in falsis fra-**

*tribus.* Voilà comme les Apostres ont presché la Foy en l'Asie, & en l'Europe, & comme il la faut prescher en l'Amerique.

Nos Peres ont tasché de suiure ces traces, selon leur petite portée. Ils meurent sur la mer, on les tuë sur la terre, on les brulle, on les mange, on les calomnie, on les persecute par tout. *Quasi morientes, & ecce vivimus.* Comme des gens qu'on fait mourir tous les iours, & qui sont encore vians. On leur ferme la porte d'un costé, ils entrent par vne autre. Ils se iettent dans le fleuve du Sagné. le surmontent malgré sa rapidité: ils penetrent dans les tenebres des plus épaisles forests, vont par tout chercher de pauvres peuples abandonnez. Les ennemis tuënt les oüailles & les pasteurs. Ils suiuent les peuples nommez les Poissons blancs, dans leurs pais: on les met à mort. Ils montent au pais des Outaouïak: on les massacre. Ils vont aux Nipisiriniens, & aux Hurons, & à la Nation Neutre: on les prend en chemin, on les brulle. On les bannit des Hurons,



72 *Relation de la Nouvelle France,*

des Nipisiriniens, & des autres peuples circonuoisins: ils se iettent dans le païs des Iroquois, ils publient les grandeurs de Dieu, ils preschent Iesus-Christ. On conspire contre eux, & contre les François: où iront-ils? que feront-ils? La porte est quasi par tout fermée à l'Euangile. Tout n'est pas encore perdu, la Mission de Tadoussac, des Porcs-épics, des Poissons blancs, & des peuples qui les frequentent: la Mission des Abnaquois, des Hurons, & des Algonquins qui sont restez, subsiste encore: & s'il plaist à Dieu de ietter ses yeux sur les Nations nouvellement decouuertes, dont vn Pere, grand Missionnaire, m'a enuoie les noms, la moisson sera plus grande, & la Mission plus sainte que iamais. Mais écoutons-le parler.

Je vous enuoie, dit-il, quelques memoires, que j'ay tirez, partie de deux François, qui ont penetré bien-auant dans le païs, partie de plusieurs Sauvages, qui sont témoins oculaires des choses que ie vay dire, lesquelles pourront seruir, pour dresser vne Carte generale de ces contrées. Vous

verrez dans le craion que j'enuoie , où j'ay posé Tadoussac , les Trois Riuieres , le Lac des Nipisiriniens , & le Grand Sault : & si ie ne les ay pas bien placez , vous corrigerez , s'il vous plaist , mon griffonnage , dans lequel vous verrez aussi les nouveaux chemins , pour aller à la mer du Nord par Tadoussac , par les Trois Riuieres , & par les Nipisiriniens , avec la distance des lieux , selon les iournées que les Sauvages ont faites , que ie mets à quinze lieuës par iour , en descendant , à cause de la rapidité des eaux , & à sept ou huit lieuës en montant. J'ay tracé ces chemins , suiuant le Rhun de vent , que les Sauvages ont marqué eux-mesmes , tousiours entre le Nord-Ouest , & l'Ouest , ou l'Ouest quart de Sur - Ouest , fort peu droit au Nord.

Vous verrez de plus les noms des principales Nations , que j'ay marquées dans la Topographie que ie vous enuoie , les designant par vne seule cabane. Toutes ces Nations sont fixes , & bien peuplées , & parlent toutes ou franc Algonquin , ou franc

74 *Relation de la Nouvelle France,*  
Montagnais , ou franc Abnaquiois :  
quelques-vns font vn mélange de ces  
trois langues , qui ont beaucoup de  
rapport entre elles : si bien que toutes  
ces Missions se peuuent appeller les  
Missions Algonquines , pource que  
celuy qui sçaura la langue Algonqui-  
ne, les entendra bien-tost, & facile-  
ment. Dieu m'a donné vne passable  
connoissance de ces trois langues. Di-  
sons deux mots de ces chemins, & de  
ces Nations.

*Chemins à la mer du Nord.*

**L**E premier chemin à la mer du  
Nord, partant de Tadoussac, tire  
quasi au Nord. En voicy la route. Il  
faut monter par le fleuve du Sagné,  
qui se dégorge dans le grand fleuve  
de S. Laurens à Tadoussac, & voguer  
iusques au lac nommé Piouakouami,  
distant de Tadoussac, en droite ligne,  
enuiron quarante lieues. Les Sauua-  
ges emploient cinq iournées à mon-  
ter par ce chemin , à cause des cou-  
rans, & des faultz qu'ils rencontrent;  
& ils ne font que deux grandes iour-



nées à descendre, fauorisez par la rapidité des eaux.

Du lac Piouakouami il faut aller à vn autre lac nommé Outakouami, distant du premier, au dire des Sauuages, comme de Kebec à Montreal, c'est à dire soixante lieues, qu'ils font en dix iours en montant, & en cinq iours en descendant.

Du lac Outakouami iusques à la mer, ie coniecture, à les oïr parler, qu'il y a enuiron soixante lieues. Ils font ce chemin en cinq iours en descendant vn peu par vne grande Baie, ou anse, qui est vis à vis de ce lac, sous la ligne du Nord.

A costé gauche du lac Outakouami, tirant à l'Ouest, vne riuiera venant des terres, ou des forests, dont ce pais est tout couuert, se vient décharger dans ce lac. Les Sauuages disent, qu'en montant par cette riuiera, on rencontre le fleuue Metaberoutin, que nous appellons les Trois Riuieres enuiron trois iournées plus auant qu'un lac, qu'ils nomment Ouapichouanon; & de là on va trouuer la Baie des peuples nommez les Kilistinons,

76 *Relation de la Nouvelle France,*  
qui sont sur la mer du Nord.

Le second chemin pour aller à cette mer, est par les Trois Riuieres, tirant au Nord-Ouest. On va des Trois Riuieres au lac appelé Ouapichiouanon, éloigné d'environ cent-cinquante lieuës de l'emboucheure des Trois Riuieres, dans le fleuve S. Laurens. Les Sauvages en descendant font ce chemin en sept iours.

De ce lac on va droit à la riuere des Ouakouingouechiouek. Les Sauvages ont fait ce chemin, au Printemps passé, en trois iours: il est bien neantmoins de quarante lieuës; mais comme il va vn petit en descendant, on auance dauantage, comme aussi le retardement est plus grand, quand on y monte.

De la riuere des Oukouingouechiouek, ie compte enuiron soixante, ou soixante & dix lieuës, iusques en la Baie des Kilistins, nommez Nisibourounik, & cela se fait en quatre iours. Vn Sauvage Kilistinon est venu en traite, ou en marchandise, à la susdite riuere des Oukouingouechiouek, il a passé l'Hyuer avec ces peu-

ples , ausquels il a donné parole de retourner au Printemps , avec bon nombre de ses gens : c'est luy qui assure, qu'il n'y a que pour quatre iours de chemin.

Troisième chemin. Les Nipisiriniens sortant de leur lac nommé Nipisin , d'où ils ont tiré leur nom de Nipisiriniens , trouuent la mer du Nord après quinze iours de chemin ; c'est à dire , que leur lac en est peut-estre éloigné de cent cinquante lieues.

Quatrième chemin. Les Achirigouans , qui habitent sur vne riuere , qui se va ietter dans la Mer Douce des Hurons , vont en peu de iournées trafiquer avec les Kilistinons Ataouabousskatouk , qui sont sur la mer. Nous verrons plus-bas , qu'il y a de plusieurs sortes de Kilistinons.

Cinquième chemin. Les Algonquins superieurs trouuent la mer en sept iournées de chemin , se rendant en trois iours au lac nommé Alimibeg , & de là ils descendent dans quatre autres iournées , dans la Baie des Kilistinons , qui borde la mer.

Voicy encore vn nouveau chemin



78 *Relation de la Nouvelle France,*

du païs des Hurons aux Trois Riuieres, sortant du lac nommé Temagami, c'est à dire eau profonde, que ie croy estre la mer Douce des Hurons, & la source du grand fleuve S. Laurens, aiant fait quelque chemin sur ce grand fleuve, on traaverse enuiron quinze lieuës, par des petits ruisseaux, iusques au lac nommé Ouassisanik, d'où sort vn fleuve, qui conduit aux Trois Riuieres. C'est par ce chemin que vingt-cinq canots Nipisiriniens arriuerent, il y a enuiron deux ans, chargez d'hommes, de femmes, & d'enfans, & de pelleteries. Ils nous dirent, qu'ils auoient trouué par tout, de l'orignac, ou des castors, ou des poissons, dont ils faisoient leur nourriture. Ils nous asseuroient, qu'il seroit facile à nos François, partant des Trois Riuieres, de se rendre dans vn mois à la mer Douce des Hurons. Voilà des routes plus diciffiles à tenir, que le grand chemin de Paris à Orleans. Marquons maintenant les noms des Nations nouvellement découuertes.

*Noms de plusieurs Nations découvertes depuis peu.*

**L**E Pere Gabriel Dreuilletes, de qui nous auons tiré la plus grande partie de ce qui est contenu dans ce Chapitre, à fait porter le nom de Saint Michel au premier Bourg, dont il fait mention. Ceux qui l'habitent, se nomment en Algonquin, les Oupouteouatamik. On compte dans ce Bourg enuiron sept cent hommes, c'est à dire trois mille ames, dautant que pour vn homme, il se trouue pour le moins trois ou quatre autres personnes, sçauoir est, les femmes & les enfans. Ils ont pour voisins les Kiskacoueiak, & les Negaouichiriniouek. On trouue en ce Bourg enuiron cent hommes de la Nation du Petum, qui s'y sont retirez, fuïant la cruauté des Iroquois.

La seconde Nation est des Noukek, des Quinipegouek, & des Malouminek. Ces peuples sont fort peu éloignez du Bourg de Saint Michel, ou des Oupouteouatamik. Ils re-

cueillent sans semer, vn certain feigle, qui vient naturellement dans leurs prairies, qu'on tient estre meilleur que le bled d'Inde. C'est icy, où enuiron deux cent Algonquins, qui demeuroient sur les riués du grand Lac, ou de la mer Douce des Hurons, du costé du Nord, se sont refugiez.

La troisiéme Nation est éloignée d'enuiron troisiournées par eau, du Bourg S. Michel, tirant dans les terres. Elle est composée des Makoutensak, & des Outitéhakouk. Les deux François, qui ont voagé en ces contrées-là, disent que ces peuples sont de tres-douce humeur.

La quatriéme Nation a vn Bourg de mille hommes, éloigné de trois iournées du Bourg de S. Michel : ce sont quatre ou cinq mille ames.

La cinquiéme Nation, qui se nomme des Aliniouek, est plus nombreuse : on y compte bien 20000. hommes, & soixante Bourgs : ce sont enuiron cent mille ames. Elle est à sept iournées de S. Michel, vers l'Ouest.

La fixième Nation, dont les peuples s'appellent les Oumamik, est distante



stante de soixante lieuës, ou enuiron, de S. Michel. Elle a bien huit mille hommes, ce sont plus de vingt quatre mille ames.

La septième, qu'on nomme les Poualak, c'est à dire, les Guerriers, contient trente Bourgades, qui sont à l'Ouest, quart de Nord-Ouest, de S. Michel.

La huitième est au Nord-Ouest, à dix journées de S. Michel. Elle a bien 40. Bourgades, habitées par les Naouechiouek & par les Mantouek.

La neufuième au de là des Nadouechiouek, à trente-cinq lieuës ou enuiron du lac Alimibeg, se nomme la Nation des Assinipoualak, c'est à dire, les Guerriers de pierre.

La dixième Nation est des Kilistinons, qui composent quatre Nations, ou quatre peuples. Les premiers se nomment les Kilistinons Alimibegouek: les seconds, les Kilistinons de la Baie Ataouabouscatouek: les troisièmes, les Kilistinons des Nipisiriniens, pource que les Nipisiriniens ont découuert leur pais, où ils vont en traite, c'est à dire en marchandise. Ils

ne sont qu'environ six cent hommes , c'est à dire deux mille cinq cent ames , qui ne sont pas beaucoup sedentaires. Leur naturel est fort accostable.

Les quatrièmes se nomment Kili-  
stinons Nisibourounik.

La quatorzième Nation a trente Bourgades , habitées par les Atsistagherronnons. Ils sont au Sud-Ouest quart de Sud , à six ou sept journées de S. Michel. Les Onnontagueronnons leur ont déclaré la guerre depuis peu.

Le Pere adioûte , qu'il a appris d'un Capitaine Nipisirinien , qu'en un seul endroit il auoit veu deux mille Algonquins cultiuans la terre , & que les autres Bourgades de la mesme contrée estoient encore plus peuplées. Le mesme Capitaine asseuroit , que du costé du Sud , & du Sudest , il y auoit plus de trente Nations , toutes sedentaires : toutes parlans la langue Abnaquioise , & toutes plus peuplées , que n'estoient iadis les Hurons , dont le nombre montoit à trente , ou trente-cinq mille ames , en dix-sept lieues de pais.

Il ne parle point, dit le Pere, des Nations connües de longue main. En effet il ne dit mot des Kichesipiiriniouek, des Kinonchepiiririk, des Ouhountchatarounongak, des Mataouchkairinik, des Ouaouechkairiniouek, des Amikouek, des Atchougek, des Ouafaouanik, des Ouraouakmikoug, des Oukiskimanitouk, des Maskafinik, des Nikikouek, des Michesaking, des Pagouitik, ce sont les peuples du grand Sault; des Kichkan-koueiak. Toutes ces Nations, dont plusieurs ont esté mal-traitées des Iroquois, se seruent de la langue Algonquine.

Voilà vn beau champ de bataille pour ceux qui voudront entrer en lice, & combattre pour Iesus-Christ. Je sçay bien que ces peuples ne sont pas attraians, comme ceux qui ont des Empires, & des Republiques, des Princes, & des Rois; comme ceux qui sont couuerts de soie, & de brocattelle; qui sont courtois, & bien polis: mais il me semble, que Iesus-Christ n'a pas beaucoup presché à ces Gens-là, & que la foy, la vertu,



84 *Relation de la Nouvelle France,*  
la sainteté , n'habitent pas si familièrement dans les Palais , que dans des maisons de chaume & de paille , & en vn mot , dans des cabanes.

Le sçay bien que la porte est maintenant fermée à quantité de Nations : que les armes Iroquoises troublent toutes les nouvelles Eglises des Sauvages : que la guerre cause vne si grande confusion par tout , qu'on ne se connoist quasi plus. Mais ie sçay bien aussi , que dans le premier âge de l'Eglise, on iugeoit quelquefois le Christianisme abattu , & puis quelque temps après , il se releuoit , & paroissoit plus florissant que iamais. *Fructum referent in patientia* . On se haste de ramasser promptement les iauelles , & les gerbes d'vn bled desia couppé : mais la moisson Euangelique se fait *in patientia* , avec patience , & dans les souffrances.

Pour donner courage aux enfans d'Israël , d'entrer dans la terre qui leur auoit esté promise , on leur fit voir des fruits de cette terre. Lisez les Relations precedentes , & vous trouuerez que les Sauvages sont capables

de Dieu, aussi-bien que les autres peuples plus policez. Le don d'oraison, l'amour des souffrances, la charité du prochain, se trouuent dans quelques-uns eminemment : *ex ungue leonem*, de l'échantillon on connoist toute la piece.

J'ay appris tout nouuellement d'une personne venue de Canadas, au mois d'Octobre, qu'un Pere de nostre Compagnie demandant à une femme Huronne, si elle n'auoit pas esté touchée d'une grande douleur, apprenant les horribles tourmens, que les Iroquois auoient fait souffrir à son mary. Non, dit-elle, ie n'en ay receu aucune tristesse. Le Pere tout surpris, luy en demande la raison. J'ay reconnu, fit-elle, que Dieu auoit accordé à mon mary, ce qu'il luy demandoit depuis six moix : car tout l'Hyuer il ne faisoit quasi aucune priere, qu'il n'ajoûta ces paroles : Tu es le maistre de la vie; si tu veux que les Iroquois nous attaquent, ne permets pas que ie sois assommé d'un coup de hache ; mais fay-moy prendre, fay-moy lier & garrotter ; fay-moy traîner en leur pais, afin que

ie fois brulé , & grillé tout vif. Je souffriray toutes leurs cruauitez tres-volontiers , pour les pechez que j'ay commis deuant & après mon Baptême. J'ay tant de regret te t'auoir fâché , toy qui es si bon , que ie prendray plaisir d'endurer tous ces tourmens. Voilà la priere de mon mary. Dieu luy a accordé ce qu'il demandoit , pour le rendre plus heureux au Ciel. Pourquoy en serois-ie triste ? On m'a rap-té (adioûtoit cette femme) que pendant le chemin , qui dura bien vn mois , il chantoit des prieres , il encourageoit ceux qui estoient pris avec luy , leur parlant du Ciel , comme s'il eust desia veu la porte ouuerte pour y entrer. Lors qu'on le brusloit , iamais il ne s'étonna , sa veuë estoit le plus souuent au Ciel. Il fit paroistre tant de ioie , que les ennemis mesmes disoient , que la foy donnoit du courage , & ostoit la crainte & la douleur des tourmens. On offrit beaucoup de presens , pour luy sauuer la vie ; mais iamais les Iroquois ne les voulurent accepter. Qui souffre saintement , porte à Dieu les presens en sa main.



On a découuert des Sauvages Chrétiens, porter la nuit du bois à la porte de quelques pauvres gens, qui n'en pouuoient faire, cherchant les tenebres pour cacher leur charité. D'autres aiant commis quelque offense, après auoir demandé pardon à Dieu, & ne se pouuant confesser, dautant qu'ils estoient à la chassé dans leurs grands bois, attachoient aux branches des arbres quelques brins de porcelaine, ou quelque autre chose qu'ils aimoient, comme vne marque de leurs regrets, & de la satisfaction qu'ils faisoient de leurs pechez, donnant ces petits presens, pour l'amour de nostre Seigneur, aux pauvres qui passeroient par là.

On demanda vn iour à vn Sauvage, qui estoit souuent & long-temps à genoux pendant la nuit, s'il prioit beaucoup le bon Dieu. Non, dit-il, pource que ie ne sçay pas ce qu'il luy faut dire. Je fay les prieres qu'on m'a apprises, tous les soirs, & tous les matins; mais cela est bien-tost fait: le reste du temps, ie pense à luy, & ie luy dis: Si ie sçauois ce qu'il te faut

88 *Relation de la Nouvelle France,*

dire, ie te le dirois. Tu sçais bien que ie t'aime; mais ie ne sçay pas comme il te faut parler. En quelque endroit que j'aille, j'ay tousiours cette pensée, que ie l'aime, que ie luy voudrois bien parler, mais que ie ne sçay pas ce qu'il luy faut dire. Voilà vne oraison bien simple, & bien pure, qui tient peu de l'entendement, mais beaucoup du cœur. Les arbres qui portent ces fruits, ne sont pas tout morts.

---

*De la mort d'une ieune Huronne,  
Religieuse Hospitaliere.*

CHAPITRE VI.

**L**Es petit pouffins craignent le milan, les petits agneaux fuient le loup, & les petits Sauvages abhorrent la contrainte. Tout cela prouient d'un mesme principe, c'est à dire, de la nature. Les Sauvages passent quasi toute leur vie, ou à la chasse, ou dans des courses, & dans des voïages, menant fort souuent avec eux leurs fem-

mes, & leurs enfans ; si bien qu'estant  
conceus dans cette passion , fortifiée  
par vne longue habitude , il est quasi  
aussi naturel à leurs enfans d'aimer la  
liberté, qu'aux petits canards d'aimer  
les ruisseaux , & les riuieres. Les Re-  
ligieuses Hospitalieres , & les Vrsu-  
lines de Kebec , auouënt que les pe-  
tites filles Sauuages ont de l'esprit,  
que plusieurs ont vn bon naturel,  
qu'on les gagne aisément avec la  
douceur : mais elles fuient grande-  
ment la contrainte. On a veu de pe-  
tites seminaristes , eleuées dans le  
Monastere des Vrsulines , non seule-  
ment pieuses & deuotes , mais si bien  
instruites , qu'elles estoient capables  
d'enseigner à lire, & à écrire leur com-  
pagnes. On les voioit faire le petit  
ménage de la maison avec adresse. En-  
fin , ces pauures enfans se voiant ai-  
mées , & goustant mesme la pieté , de-  
mandoient , & pressoient qu'on les fist  
Religieuses : mais enfin , comme on  
les retenoit long-temps , pour éprou-  
uer leur vocation , & pour les accou-  
stumer à vne vie sedentaire , & ren-  
fermer dans vn cloistre , l'âge leur fai-



sant ressentir les inclinations qu'elles ont d'aller & de venir, elles disoient franchement à leurs maistresses, qu'elles n'auoient pas assez d'esprit, pour estre tousiours en place, témoignant la peine, & les regrets qu'elles auoient de les quitter. Le temps changera petit à petit cette humeur, & la grace ne laissera pas d'en gagner quelques-vnes à la Religion, comme celle, dont la Mere superieure de l'Hostel-Dieu de Kebec va parler dans ce Chapitre, qui est entre mes mains.

Le suiet, dit-elle, de la presente est également plein de ioie, & de tristesse, puisque nous acquerons vne aduocate au seiour de la gloire, en perdant encore cette année vn tresor, que nous possedions comme propre. Par la mort de nostre chere Sœur Geneuiefue Agnes de tous les Saints, vous diriez que Nostre Seigneur se plaist tellement au choix que nous faisons, des filles du païs pour son seruice, qu'il en a voulu aussi tost tirer à soy les premices, nous les rauissant pour le Ciel. En effet, le 15. du mois de Mars 1657. nostre petite Commu-

nauté donna la premiere fille Religieuse, natue du pais: & le 3. de Novembre de la mesme année, la premiere fille Sauuage, qui aie iamais embrassé la vie Religieuse. Ceux qui connoissent l'humeur des Sauuages, auront peine à se persuader, qu'une ieune fille de leur Nation ait voulu se captiuer aux exercices de la Religion, & à garder la closture: mais la grace qui fait trouuer de la douceur, & de la facilité dans les choses les plus repugnantes à la nature, a trouué tant d'entrée dans le cœur de cette chere fille, que nous auons toutes admiré les aimables conduites de Dieu sur elle.

Elle nous fut donnée le mois de May 1650. âgée de huit à neuf ans. Elle estoit fille d'un des principaux Capitaines Hurons. Son pere & sa mere estoient excellens Chrestiens. Si-tost qu'elle fut avec nous, elle s'appliqua fortement à apprendre la langue Françoisse, & y réussit si bien, qu'en moins d'un an elle la sceut parfaitement. Elle apprit promptement à lire & écrire, en sorte qu'elle sur-

92 *Relation de la Nouvelle France,*

passoit toutes ses compagnes, mesme les Françoises. Nous auons souuent admiré, qu'une fille Sauvage, nourrie & élevée dans les bois, pût si-tost comprendre ce qu'on luy enseignoit. Aussi son esprit n'auoit-il rien de sauvage, & son naturel estoit excellent. Elle ne sçauoit de quelle couleur étoit le vice; & s'il luy arriuoit de faire quelque petite faute, elle ne cherchoit point d'excuse, pour la couvrir, mais elle s'en accusoit incóntinent. Sa grande sincerité estoit vne marque de la bonté de son cœur. La Maistresse des pensionnaires les reprenant quelquefois en general, si elle croioit auoir failly, elle excusoit incóntinent les autres, & prenoit tout le tort sur elle-mesme, ne pouuant souffrir qu'on accusast ses compagnes. Aussi l'aimoient-elles vniquement. Après qu'elle eut appris à lire & à écrire, on la mit à la cuisine, pour la tenir toujours dans vn esprit de soumission. Elle s'y comporta avec tant de ferueur & d'humilité, que cela nous donnoit à toutes de l'étonnement. Iamais on ne l'a entenduë se plaindre, ny



murmurer. Si deux ou trois personnes luy commandoient diuerſes choſes tout à la fois, elle ne s'en faſchoit point, mais avec vne grande douceur elle faiſoit, autant qu'elle pouuoit, tout ce qui luy eſtoit commandé. Il y auoit du plaſiſr à la voir quitter iuſques à cinq & ſix fois vne choſe, pour en faire vne autre, qu'on luy commandoit de nouueau: ce qu'elle faiſoit avec autant de gaieté, que ſi on luy euſt laiſſé faire tout ce qu'elle euſt ſouhaité. Le grand deſir qu'elle auoit d'eſtre Religieuſe, ne luy faiſoit rien trouuer de difficile, quoy que nous l'éprouuaſſions par toutes ſortes de moiens, ſans que pendant ſept années qu'elle a demeuré avec nous, nous aions pû remarquer aucun changement dans ſon eſprit. Elle apprehendoit plus que la mort, de retourner avec ſes parens: en ſorte qu'un iour, pluſtoſt pour l'éprouuer, que pour la punir d'aucune faute qu'elle euſt faite, on la fit venir au reſectoire, deuant toute la Communauté, & l'ayant reſpriſe aſſez ſeuerement, on luy donna le choix, ou de ſortir du Conuent,

ou de recevoir la discipline. Cette pauvre innocente n'eut pas plustost oüy le mot de sortir, que les grosses larmes luy coulerent des yeux, & ioignant les mains, elle nous pria de ne la point mettre dehors, nous protestant qu'elle estoit prestee de recevoir telle penitence qu'on voudroit. A mesme temps elle commença à se des-habiller : mais on n'auoit garde de passer outre. C'est vne chose tres-peu visitée parmy les Sauvages, de tancer leurs enfans, bien moins de les frapper. Il ne sçauent que c'est de les contrarier en leur ieunesse : d'où on peut voir, qu'il falloit vne grace bien grande en cette ame innocente, pour la refoudre à ce qu'elle apprehendoit tres-fort naturellement. Ses parens luy aiant donné souuent des attaques, pour l'obliger à sortir, elle a tousiours esté ferme comme vn rocher. Tant de bonnes dispositions ont esté suivies de beaucoup de graces, entre lesquelles celle d'estre receuë au Nouiciat ne luy estoit pas la moins considerable. Ce bonheur luy arriua le iour de l'Annonciation de la tres-sainte Vierge,

de l'année 1657. qu'elle commença à faire les fonctions de la Religion, avec autant d'exactitude, qu'une ancienne professe. Elle donnoit de l'admiration par son humilité, par sa sincérité, par sa douceur, & par sa deuotion, qu'elle portoit sur tout à la tres-immaculée Mere de Dieu, qu'elle aimoit avec une tendresse nompareille. Elle continuoit, & alloit croissant dans cette vertu, & nous donnoit de grandes esperances pour le futur. Mais nostre Seigneur qui a bien d'autres veuës que les hommes, qui est maistre absolu de toutes les creatures, en a disposé tout autrement : car au milieu, ou plustost au commencement de cette belle course, il l'a rauie à la terre, pour la donner au Ciel, luy enuoiant une maladie assez commune aux Sauvages, qui est une espeece de langueur, jointe à une fièvre lente, qui la consummoit de telle sorte, qu'elle diminuoit à veuë d'œil, avec une fluxion accompagnée d'une grosse toux, qui luy gastoit toute la poitrine, en sorte que son poulmon se dessecha peu à peu.



Nonobstant toutes ces infirmittez, qui en auroient abattu beaucoup d'autres, où elle monstra bien que la vertu est aussi forte, pour l'animer à la patience, qu'elle auoit paru paisible & tranquille dans sa plus parfaite santé : car elle ne laissoit pas de travailler autant, & plus que ses forces ne luy permettoient, se trouuant à toutes les obseruances du Chœur, & de la Communauté : & si après cela elle auoit quelque temps de reste, elle l'emploioit à aller rendre des visites au S. Sacrement, ou bien à apprendre à chanter, à quoy elle reüssissoit bien, aiant vne fort belle voix. Elle s'exerçoit sur tout à dire des Leçons de Tenebres ; ce qu'elle faisoit avec vne deuotion, & vne attention rauissante, qui nous seruoit à toutes d'exemple. Le dernier Carefme, quoy qu'elle fust dès lors assez mal, elle ne laissa pas d'en chanter vne, chacun des trois iours de la Semaine-sainte : & le mal augmentant petit à petit, il luy fallut ceder, & se ranger à l'Infirmierie, enuiron la feste de l'Assomption de la Sainte Vierge. Ce fut là

là qu'elle fit voir tant de douceur, de soumission, & de vertu, que cela n'est pas croiable, ne donnant jamais aucun relasche à sa deuotion. La Mere, qui auoit soin d'elle, comme Infirmiere, & qui estoit nouuellement arriuée de France, me disoit souuent, qu'à moins que ie l'asseurasse, qu'elle fust Sauuage de Nation, elle ne le croiroit pas, veu qu'elle n'en voioit aucune marque en cette chere fille. Je voy, disoit cette Mere, qu'elle fait tout ce que j'ay veu faire aux plus parfaites Religieuses de France, dans leurs maladies. En effet, dès le commencement de son mal, elle demanda vn Crucifix, qu'elle ne quitta jamais, & qui estoit son plus ordinaire entretien; elle le carressoit sans cesse. Elle n'obmit iamais ses petites prieres, sur tout son Chapellet, quoy que son oppression fust violente: & quand on luy disoit, que cela la faisoit souffrir dauantage, incontinent sa soumission luy mettoit en bouche ces paroles: Ma Merè, ie feray tout ce qu'il vous plaira; mais cela seul est ma consolation & mon diuertissement.

Le naturel Sauvage porte à la liberté, & à vouloir absolument ce qui luy plaist, ou fuir ce qui luy déplaist. Elle auoit parfaitement dompté ces inclinations ; en sorte que si quelquefois elle s'estoit laissée emporter à quelque legere impatience, on la voioit, vn moment après, reuenir à elle, & demander pardon mille fois, avec vne humilité admirable. Son innocence estoit si grande, que luy demandant quelquefois, si elle vouloit se confesser, cette ame angelique répondoit : Helas ! mon Dieu, que diray-ie ; depuis ma dernière confession ie n'ay rien fait : & à mesme temps elle fondoit en larmes, craignant que cela ne procedast de son aueuglement. Ah, ie vous prie, (disoit-elle) examinez moy ; car ie n'ay point d'esprit, pour me connoistre. Ce sentiment d'elle-mesme estoit bien contraire aux pensées de ceux qui gouernoient sa conscience. Ils asseurent, qu'elle leur rendoit vn compte exact de tous les mouuemens de son cœur, avec beaucoup d'intelligence : & ils protestent tous, qu'elle a probablement conserué



la blancheur de son innocence baptis-  
male. Jamais, quelque foiblesse qu'elle  
eust, elle ne pût souffrir de communier  
dans son lit; mais elle prioit qu'on la  
menast au Chœur. Elle ne perdit pas  
vne Communion, tant qu'elle se pût  
traisner à l'Eglise. Des dispositions si  
rares dans vne fille Sauuage donne-  
rent, pour ainsi parler, iusqu'au cœur  
de Dieu, qui voulut pour soy ce fruit  
meur: de quoy son Infirmiere s'apper-  
ceuant, & la voiant d'ailleurs dans vn  
desir extrême de iouir du bonheur  
d'estre reuestuë de nostre saint habit  
qu'elle demandoit sans cesse elle-mes-  
me; enfin on luy accorda cette grace,  
le iour de la feste de tous les Saints: ce  
qui fut fait avec toutes les ceremonies,  
que pût permettre sa maladie. Si ia-  
mais vous auez veu la ioie, & le con-  
tentement dépeints sur vn visage, ce  
fut sur celuy de cet ange incarné: car  
quoy qu'elle fust foible au possible,  
elle s'aidoit à se vestir, comme si elle  
eust esté saine. Elle fit toutes les de-  
mandes necessaires, avec vne presen-  
ce d'esprit nompareille. Si tost qu'elle  
eut l'habit, on luy donna le saint Via-

100 *Relation de la Nouvelle France,*  
tique, qu'elle receut avec vne deuotion rauissante.

Depuis cet heureux iour, qu'elle se vit Religieuse Hospitaliere, & fille de nostre glorieux Pere S. Augustin, il ne se peut dire quelle estoit la iubilation de son cœur, & les remerciemens qu'elle nous en rendoit à toutes. Si elle nageoit dans la ioie de cette faueur, nostre petite Communauté n'en ressentoit pas moins, d'auoir donné son saint habit à la premiere fille Sauvage de ces contrées, qui ait iamais eu le bonheur d'entrer en Religion: mais nous ne le possedasmes pas longtemps sur terre; car Dieu voulant cueillir ce premier fruit, qui estoit meur, il permit que son mal la iettast dans l'extremité; de quoy son Infirmiere, qui ne la quittoit ny iour, ny nuit, m'ayant donné auis, ie luy fis administrer aussi-tost le dernier Sacrement, qu'elle receut avec vne singuliere attention à Dieu, demandant, selon la coustume, pardon à toute la Communauté presente, avec des sentimens d'une veritable fille de la misericorde, ne cessant de produire quan-

rité d'excellens actes des plus hautes vertus, que de temps en temps on luy suggeroit. Elle fit retirer tout le monde, excepté la Superieure, laquelle luy demanda, si elle seroit bien-aise de faire les vœux de la sainte profession: nostre chere malade luy dit sagement; que ce luy seroit vne grande grace, mais qu'elle ne la meritoit pas, & qu'elle n'osoit la demander; que si on la luy accordoit, sa ioie seroit accomplie. La Superieure iugeant qu'elle auoit encore du temps à viure, ne se hastapas, laissant passer ce iour: mais lendemain, qui estoit vn Samedy, la voiant sur les approches de sa fin, luy dit; Ma chere Sœur, desirez-vous proferer les vœux? Alors nostre innocente agonizante, comme se réueillant, ditauec empressement: Ah, que j'ay de passion pour ce priuilege. Ce qui obligea la Mere, de les luy faire prononcer, & au mesme instant elle tomba en l'agonie. Nostre Communauté aiant esté appelée, elle la voioit avec admiration, former mille colloques amoureux à N. Seigneur, priant actuellement pour Madame la



Duchesse d'Eguillon, nostre chere & illustre Fondatrice, & pour la conuersion de ceux de sa Nation. Enfin cette ame angelique quitta la terre dans ce saint Exercice : rendant son esprit à celuy qui ne l'auoit créé que pour luy. Elle estoit de fort belle taille, & bien agreable de visage, d'un naturel excellent, & d'un esprit au dessus du commun, non seulement des Sauuages, mais aussi des François. Nostre consolation est, de posséder en dépost, parmy celuy de nos autres Religieuses decedées en la Nouvelle France, le corps de cette petite Colombe, dont nous nous glorifions d'estre les depositaires, comme d'un riche trésor. Tous les Sauuages vinrent, comme à l'enuie, avec vne ioie nompareille, pour la voir inhumer dans nostre saint habit : ce qui les rauissoit, parce qu'elle paroissoit avec vne beauté charmante. Tant il est vray que la mort des iustes est precieuse en toutes façons. Voilà en verité vne mort bien sainte, & bien precieuse deuant Dieu. Mais changeons de discours. Le Chapitre qui suit, venu à la trauerse,

es années 1657. & 1658. 103

nous fera voir ; avec vne gaieté , & vne naïfueté bien naturelle , que les Sauvages font quasi nos Antipodes en leurs façons de faire.

---

*De la diuersité des actions & des façons de faire des François, ou des Européans, & des Sauvages.*

## CHAPITRE VII.

**I**E ne ſçay ſi ie me trompe , mais ie dirois volontiers , que l'organe de nos ſens reſſemble en quelque choſe , à la matiere premiere ; qui n'ayant de ſoy ny beauté , ny difformité , compoſe neantmoins les plus belles choſes , & les plus laides , ſelon les formes que les Agens leur donnent. Le temperament de nos ſens , de quelque coſté qu'il vienne , ſoit de noſtre naiſſance , ou de nos habitudes , leur donne de la pente , ou de l'aueſſion ; de l'amour , ou de la haine , pour les obiets qui leur ſont propoſez. De cette ſource , à mon aduis , prouient la grande diuer-

sité qu'il y a entre les sens des Sauvages, & des François, ou des Européens : car vous diriez en plusieurs choses, que ce qui est du sucre aux vns, est de l'absynte aux autres. Commençons par l'odorat.

Il se trouue en ces quartiers de l'Amérique, des animaux, auxquels les François ont donné le nom de Rats musquez, pource qu'en effet ils ressemblent aux rats de France, sinon qu'ils sont bien plus gros, & qu'ils sentent le musc au Printemps. Les François aiment beaucoup cette odeur ; les Sauvages la rebutent, comme vne puanteur. Ils soignent & se gressent la teste, & la face, avec des huiles, & avec de la gresse, qui nous put comme la charogne : c'est leur musc, leur orangeade, & leur binjoïn. La rose, l'œillet, le girofle, la muscade, & semblables odeurs, qui nous sont agreables, leur sont fades : & le tabac, qui fait mal au cœur à ceux qui n'ont point accoustumé de le sentir, fait vne des plus grandes de leurs delices.

Pour l'oreille. Encore que les Sau-



uages se plaisent fort au chant, vn concert de musique leur semble vne confusion de voix : & vne roulade passe parmy eux , pour vn gazouillis d'oiseau. L'auouë que le ramage ne leur est pas des-agreable : mais leurs chansons , qui pour estre mornes & pesantes, nous donnent des idées de la nuit, leur semblent iolies, comme l'émail du iour. Ils chantent dans les dangers , dans les tourmens, & dans les approches de la mort: les François gardent, pour l'ordinaire, vn profond silence dans tous ces rencontres. Le sel qui assaisonne toutes les viandes qu'on mange en Europe , les rend ameres au goust des Sauvages. Leur boucan , qui nous est quasi de la suie, leur est fort sa- uoureux. La communication des vns avec les autres, fait que le palais de quelques François s'accommode au boucan, & celuy de quelques Sauua- ges, aux viandes salées. Il est vray, que iusques icy ie n'en ay point veu, qui n'ait eu de l'horreur du fourmage de Hollande, des raues, des epiteries, de la moutarde, & de semblables ragoufts. Ie me souuiens à ce propos, qu'un Sau-

uage s'estant rencontré à table avec des François, comme on auoit seruy de la moutarde, la curiosité de goûster de tous nos mets, sans les connoître, luy fit porter sa cuillier dans ce ragoust; en aiant pris vne assez bonne charge, il l'entonna plus viste dans sa bouche, qu'on ne luy eut appris, comme cela se mangeoit: Dieu sçait s'il appresta à rire à toute la compagnie? C'est vne gloire parmy les Sauvages de bien manger, comme parmy plusieurs Europeans de bien boire: & ce bon homme voulant monstrier la force de son courage, s'efforçoit de faire bonne mine; mais les larmes le trahissoient: il ferroit les dents, & les leures tant qu'il pouuoit. Enfin, le peu de bonne mine, & de contenance qu'il auoit, luy échappa, & demeura bien étonné de la force de cette bouillie iaune, comme il l'appelloit. Pour conclusion, on luy enseigna comme il falloit manger de la moutarde: mais il n'a iamais reduit en pratique cette leçon, se contentant de cette premiere experience pour le reste de ses iours. Les saulces, les ragousts, les saupi-

quers , qui font les delices des friands , feroient icy vn petit enfer au gosier des Sauvages.

Encore qu'ils aient le cuir plus tendre , & plus delicat que les François , si on en croit aux lancettes , & à la main des Chirurgiens , qui attribuent cette delicateffe aux huiles , & aux gresses dont ils soignent , & dont ils se frottent : si est-ce que ces bonnes gens n'ont point la moleffe , ny la delicateffe de nos Europeans. Ils trouvent le sommeil plus doux sur vn lit de terre , & sur vn cheuet de bois , que plusieurs personnes sur le duvet. Il est vray que l'habitude fait que le tact rebutte la trop grande moleffe , trouvant son plaisir , & sa satisfaction dans des choses plus dures & plus aspres. J'ay connu des Peres , qui ne pouoient prendre leur sommeil sur vn lit , pour s'estre accoustumez à dormir comme les Sauvages : si on leur presentoit , au retour de leur Mission , vne paillasse , ou vn matelas , ils étoient contraints , iusqu'à ce qu'ils eussent repris leur premiere habitude , de passer vne partie de la nuit sur le



paué de la chambre, pour dormir vn peu de temps plus à leur aise. En vn mot, les Sauuages sont quasi demy-nuds, pendant l'Hyuer, & les François se couurent le plus chaudement qu'ils peuuent.

Pour ce qui concerne le sens de la veüe. Il est tout certain, qu'il est vniuersellement plus parfait chez les Sauuages, que chez les François: l'expérience s'en fait quasi tous les iours. S'il faut découurir quelque chose, les François ne se fient pas tant à leurs propres yeux, qu'aux yeux des Sauuages. Ils les ont tous noirs, & plus petits que les autres. Le me persuaderois volontiers, que l'ascendant qu'ils ont par dessus nous en cet endroit, prouient de ce qu'ils ne boient point de vin; de ce qu'ils ne mangent ny sel, ny épices, ny autres choses capables de dessécher, & d'alterer le temperament de l'œil. Quoy qu'il en soit de la bonté de leurs veuës, il faut confesser, qu'elle trouue souuent de la beauté, où la nostre ne trouue que de la laideur. Ceux qui mettent la beauté d'un visage dans la proportion de ses

parties , & dans la blancheur , & le vermillon qui le couure , doiuent retrancher la moitié de leur definition, s'ils ne veulent choquer les Afriquains , les Ameriquains , & quantité d'Asiatiques. Mais venons au detail de ce point.

Pour rendre vn visage plus beau en France , on le degresse , on le laue le plus soigneusement qu'on peut : les Sauvages au contraire , l'oignent & le gressent tant qu'ils peuuent , le croiant d'autant plus agreable , qu'il est plus luisant de leurs gresses , ou de leurs huiles. Pour se rendre difforme dans l'Europe , on se barboüille de noir , de iaune , de bleu : & c'est cela mesme qui fait vn Sauvage beau , & bien agreable. Quand quelqu'un d'eux veut aller en visite , ou assister à quelque festin , ou à quelque danse , il se fait peindre le visage de diuerses couleurs , par quelque femme , ou par quelque fille ; car c'est l'un de leurs metiers , aussi-bien qu'autrefois parmi les Juifs : & lors qu'il est bien barboüillé , on le tient vn bel homme ; & en Europe , on le prendroit pour vn demon.

En France, les gros yeux, & les leures pluſtoſt ferrées qu'ouuertes, ont de la beauté. En Afrique, les petits yeux, le teint le plus noir, les groſſes leures pendantes & renuerſées, font vn beau viſage. En Canadas, les yeux noirs, & le viſage gros, à la façon des anciens Ceſars, emportent le prix de la beauté, & de la grace. En Europe, les dents les plus blanches ſont les plus belles. Les Maures, & les Sauuages nous ſurpaſſent en cette beauté : ils ont les dents plus blanches que l'iuoïre. En quelques endroits de l'Inde Orientale, ceux qui prennent du Betel, ont les dents rouges, & cette couleur fait vne partie de leur gloire.

En France, les cheueux vn petit blonds, bien ſauonnez, & bien degreſſez, bien gauffrez, & bien annelez, ſont les plus beaux. Les Neïgres les aiment courts, & noirs, & bien creſpez. Les Sauuages les veulent longs, roïdes, noirs, & tout luiſans de greſſe. Vne teſte frifée leur eſt auſſi laide, qu'elle eſt belle en France. Il n'y a rien de ſi groteſque, comme la perruque des Sauuages. Au lieu de



poudre de Cypre, ils mettent sur leurs cheveux bien gressez, le duuet, ou la petite plume des oiseaux, & avec ce bel ornement, ils se croient aussi iolis, que ceux qui portent des galants. En effet, cette plume est aussi delicate, que la baue des vers à soie.

On ne fait point le poil à la mode en ce pais-là. Leur fantaisie est leur mode. Quelques-vns les portent releuez sur le haut de la teste, la pointe en haut. Il se trouue vne Nation toute entiere, qui se nomme les cheveux releuez, pource qu'ils aiment cette façon de coiffure. D'autres se rasent sur le milieu de la teste, ne portant du poil qu'aux deux costez, comme de grandes moustaches. Quelques-vns decouurent tout vn costé, & laissent l'autre tout couuert. Les moustaches se portent en France aux costez de la teste, les femmes Sauvages les portent sur le derriere, ramassant leurs cheveux en vn petit pacquet, qui pend sur leurs espauls. Iugez maintenant qui a perdu, ou qui a gagné. Chacun croit sa mode la plus belle. La nostre change souuent en France.

On tient que la barbe donne de la grace , & de l'ornement à l'homme. Cette opinion n'est pas receüe par tout. La barbe est la plus grande difformité que puisse auoir vn visage , en ce nouveau monde. Les peuples de ces contrées , appellent les Europeans barbus , par grosse iniure. Il y a quelque temps , qu'un Sauvage enuifageant vn François , avec vne attention toute extraordinaire , & dans vn profond silence , s'écria tout à coup , après l'auoir long - temps considéré : O le barbu ! ô qu'il est laid ! Ils ont si peur de cette difformité , que si quelque poil veut naistre de leur menton , ils l'arrachent aussi-tost , pour se deliurer de nostre beauté , & de leur laidur.

Les Dames , en Europe , se plaisent d'estre bien coiffées : ce leur est vne grande mesiance , de paroistre la teste nuë , & les cheueux épars confusément , sans ordre. C'est l'une des beautés des femmes de Canadas : elles vont ordinairement la teste nuë , & se tiennent pour bien iolies , quand leurs cheueux sont bien luisans , & bien

bien roides de gresse : elles les portent espars sur les deux costez , ramassant ceux de derriere en vn petit faisseau , qu'elles enrichissent de petit grains de leur porcelaine.

La coiffure , en France , distingue les hommes d'avec les femmes. Quand les Sauvages se couurent la teste , toute coiffure leur est bonne : vn homme se seruiroit aussi bien d'vn chaperon qu'une femme , s'il treuuoit ce bonnet chaud , & commode à sa teste. Il est vray que ceux qui nous frequentent plus souuent , commencent à distinguer leur coiffure. Les hommes aiment nos chapeaux , ou nos tapabords , & les femmes nos bonnets de nuit de laine rouge ; les plus longs , & les plus hauts en couleur , leur semblent les plus beaux. Ils ne sont pas pourtant si scrupuleux , qu'une femme ne se serue d'vn tapabort , & vn homme d'vn bonnet de nuit tout au beau milieu du iour. Si vn garçon se vestoit en fille dans l'Europe , il feroit vne mascarade. En la nouvelle France , la robe d'une femme n'est point mal-seante à vn homme. Les Meres Vr-



114 *Relation de la Nouvelle France,*

fulines, ayant donné vne robe à vne ieune fille, qui sortoit de leur seminaire, le mary qui l'espousa, s'en seruit bientoſt après, auſſi gentiment que ſa femme; & ſi les François s'en mocquoient, il n'en faiſoit que rire, prenant leur gaufferie pour vne approbation.

En France. On ſe perçoit, il n'y a pas long temps, le bout de l'oreille, pour y pendre vne petite fleurette de vanité: l'ouuerture la plus petite eſtoit la plus gentille. En Canadas, les hommes & les femmes ont les oreilles percées: on les perce aux enfans dès le berceau; les plus grands trous ſont les meilleurs, ils y fourent aiſément vn baſton de cire d'Eſpagne: & non ſeulement le bas de l'oreille eſt percé, mais encore le tendon, ou le contour, que les femmes chargent ordinairement de coquillage, qu'on appelle la porcelaine.

En d'autres endroits de l'Amerique, quelques Nations ſe percent le nez, entre les deux narines, d'où ils font dependre quelques ioliuetes; d'autres enchaſſent des pierreries dans

leurs iouës, & d'autres sur leurs lèvres pendantes & renuersées, & tout cela pour contenter leurs yeux, & pour trouuer le point de la beauté. En verité, la veuë, & le iugement des hommes est foible ! Comment se peut-t-il rencontrer tant d'orgueil, & tant d'estime de nous mesmes dans nos esprits si bigearres & si limitez.

On porte, en France, les bracelets au poignet de la main. Les Sauuages les portent non seulement au mesme endroit, mais encore au dessus du coude, & mesme encore aux iambes, au dessus de la cheuille du pied. Pourquoy ces parties ne meritent-elles pas bien leur vanité, & leur enioliuement, aussi bien que les autres, puisqu'ils les portent ordinairement découuertes ? Diogene voiant qu'on presentoit vne couronne, à celuy qui auoit merité le prix de la course, la prit & luy mit aux pieds, & non sur la teste, voulant honorer la partie du corps, qui luy auoit donné la victoire.

Il n'y a que les femmes en France qui portent des coliers. Cét ornement est plus commun aux hommes

de Canadas qu'aux femmes. Au lieu de perles, & de diamans, ils portent des grains de porcelaine diuerfement enfilez, des grains de chappelets, de petits tuiaux ou canons de verre, ou de coquillage. J'ay veu vn Huron porter à son col, vne poulie de barque, & vn autre des clefs qu'ils auoient dérobbées. Toutes les choses extraordinaires leur sont agreables, pourueu qu'elles ne leur coustent qu'vn larcin.

Nous coupons nos ongles. Les Sauvages les laissent croistre, si vous les accusez de rusticité, vous serez condamné par des peuples entiers de l'Inde Orientale, qui nourrissent leurs ongles tant qu'ils peuuent, pour marque de leur noblesse: voulant témoigner par là, que leurs doigts, embarrassez de ses superfluitez naturelles, ne sont point propres au trauail.

En France. Les hommes & les femmes se font faire des habits assez iustes, pour paroistre plus lestes. les filles particulièrement, font gloire d'estre menuës. En Canadas tout le monde s'habille au large: les hommes & les femmes portent des robes, qu'ils ceignent



*és années 1657. & 1658.* 117

en deux endroits, au dessous du nombril, & au dessus du ventre, retroussant leurs grandes robes, & les repliant, en sorte qu'ils ont comme vn grand sac à l'entour du corps, dans lequel ils fourent mille choses. Les meres y mettent leurs enfans, pour les caresser, & pour les tenir chaudement.

Plus les robes des Dames sont longues, & plus elles ont de grace. Les femmes Sauvages se mocqueroient d'vn habit, qui descendroit beaucoup plus bas que les genoux. Leur travail les oblige à suiure cette mode.

En Europe. La cousture des bas de chausse est derriere la iambe, & si les bas ont quelques arrieres-points, ou quelque autre enrichissement, il est sur cette cousture, & sur les coins. Il n'en est pas de mesme parmy les Sauvages; la cousture des bas que portent les hommes, est entre les iambes, ils attachent en mesme endroit de petits ourages faits de brins de porcespic, teins en écarlatte, en forme de franges, ou de papillottes, qui se rencontrant les vnes contre les autres dans leur demarche, ont ie ne sçay

118 *Relation de la Nouvelle France,*  
quelle gentillesse bien agreable. Les  
femmes portent cet ornement au de-  
hors de la iambe.

Les patins, en France, & les sou-  
liers releuez passent pour les plus  
beaux; ils passent parmy ses peuples,  
pour les plus laids; pource qu'ils sont  
les plus incommodes. Les souliers  
des Sauvages sont aussi plats, mais bien  
plus larges que les chaufsons d'un tri-  
pot, notamment l'hyuer, qu'on les  
fourre, & qu'on les garnit pleinement  
contre le froid.

On porte les chemises, en Europe,  
sur la chair, dessous les habits. Les  
Sauvages les portent assez souuent par  
dessus leur robe, pour la conseruer  
contre la neige, & contre la pluie,  
qui coule bien aisement sur du linge  
gras, comme sont leurs chemises; car  
ils ne sçauent ce que c'est de les blan-  
chir.

Quand le bout d'une chemise sort  
d'un habit, c'est une messeance; mais  
non pas en Canadas. Vous verrez des  
Sauvages reuestus à la Françoisse, d'un  
bas d'estame, & d'une casaque sans  
haut de chauffe: on voit deuant, &

derriere deux grands pans de chemise, sortir de dessous leur casaque. Cela choque les François, & les fait rire : les Sauvages n'en perdroient pas vn petit brin de leur grauité. Cette mode leur paroist d'autant plus gentille, qu'ils prennent nos hauts de chausses pour des entraues. Ce n'est pas que quelques-vns n'en portent quelque-fois, par brauerie, ou par gaufferie.

Les bons vieux Gaulois pendoient; le siecle passé, leurs esкарцелles deuant eux. Les François mettent maintenant leurs bources dans leurs pochettes. Les Sauvages portent leur pochette, leur bource, & leur esкарцelle derriere le dos. C'est vn sac, qu'ils passent à leur col, par le moien d'une courroie, dans lequel ils mettent leur petun, & les autres petits besoins, dont ils ont plus ordinairement à faire. Cette pochette, ou ce sac, n'a pour l'ordinaire, aucune cousture. Les Huronnes les font aussi artistement qu'un ouvrage fait à l'aiguille : les Algonquins fontsouuent d'une peau toute entiere, d'un loutre, d'un renard, d'un petit ours, ou d'un castor, ou de quelque



120 *Relation de la Nouvelle France,*

autre animal, si gentiment écorché, que vous diriez qu'il est tout entier : car ils n'ostent ny les dents, ny les oreilles, ny les pattes, ny la queue : elles font vne ouuerture au dessus du col, par où elles tirent le corps entier de l'animal, & par où les Sauvages portent la main dans cette pochette, quand elle est bien sechée, & bien passée.

La ciuilité & l'honnesteté nous ont appris à porter des mouchoirs : les Sauvages nous accusent de saleté en ce point : pource que nous mettons disent-ils, vne ordure dans vn beau linge blanc, & nous la ferons dans nostre pochette, comme vne chose bien precieuse, & eux la iettent par terre. De là vient, qu'un Sauvage voiant vn iour, qu'un François s'estant mouché replioit son mouchoir, luy dit en riant; si tu aimes cette ordure, donne-moy ton mouchoir, ie le rempliray bien-tost. Je ne fais pas profession de garder vne grande suite, dans ces bigarreures, elles sortent de ma plume, comme elles se presentent à ma pensée.

Les Romains, & quelques Asiati-

ques, se couchoient autrefois sur de petits lits, pour prendre leur repas; leurs tables estoient faites en demylunes. La pluspart des Europeans sont maintenant assis sur des sieges releuez, se servant de tables rondes ou carrées. Les Sauvages mangent à terre, aussi bien que les Turcs, comme font aussi plusieurs peuples de l'Asie. Le monde est plein de variété & d'inconstance, on n'y trouuera iamais de fermeté solide. Si quelqu'un estoit monté sur vne tour assez haute, d'où il püst voir, à son aise, toutes les Nations de la terre; il seroit bien empesché de dire ceux qui ont tort, ou ceux qui ont raison: ceux qui sont fous, ou ceux qui sont sages dans des varietez, & dans des bigarreures si étranges. En verité il n'y a que Dieu seul de constant: luy seul est immuable: luy seul est invariable, c'est là où il se faut attacher, pour eui-ter le changement & l'inconstance.

En France. On entre-mesle le boire avec le manger. Les Algonquins font tout le contraire en leurs festins: ils mangent premierement ce qu'on leur sert, & puis ils boient sans plus toucher à la viande.

122 *Relation de la Nouvelle France,*

En France. Celuy qui inuite ses amis, se met en table, & leur sert des viandes, qu'il a fait apprester: en ce país, le maistre du festin ne mange point, & quelques fois il fait distribuer par vn autre, les mets de son banquet.

Les plats, en Europe, sont mis sur la table, pour donner liberté à tous les conuiez de trancher par où bon leur semblera. Là on donne à vn chacun son mets, & sa part. Il semble que Ioseph, traitant ses freres en Egypte, en fit de mesme; & que Samuel ayant inuité Saül, garda la coustume qui regne en ces contrées.

Les François, pour l'ordinaire, parlent beaucoup en table: les Sauuages fort peu, ou point du tout.

C'est vn commun prouerbe, que la saulce fait souuent manger le poisson. Ce prouerbe n'est point receu en ce nouueau monde: car vn Sauuage ne sçauroit manger de poisson trempé dedans nos saulces. Les François n'aiment pas ordinairement les œufs, s'ils ne sont mollets. Les Sauuages disent, que les œufs mollets sont encore tout



cruds : c'est pourquoy ils les font durcir pour les manger.

Les François ont horreur d'un œuf couuis : les Sauvages mangent avec delices, le petit oiseau qui est encore dans l'œuf. En effet, il est fort delicat. J'ay mangé d'un petit outardeau tiré d'un œuf bien bouilly : la chair estant netoïée des immondices qui l'environnent, en est tres-belle, & de tres-bon goust : pour les œuf couuis, dont il ne se formeroit aucun pouffin, ils sont puants par tout le monde, comme ie croy. Je n'en oserois neantmoins quasi asseurer, tant les nez, & le palais des hommes sont differens.

La gresse toute pure fait mal au cœur aux François ! les Sauvages la boient, & la mangent figée. On iette en France l'escume du Pot comme l'excrement de la viande : les Sauvages la hument, comme un excellent bouillon, notamment dans leur necessité.

On laue la viande pour en nettoier le sang, & les ordures : les Sauvages ne la lauent point, de peur d'en perdre le sang, & une partie de la gres-

124 *Relation de la Nouvelle France,*

se. On commence ordinairement le dîner par le potage : c'est le dernier mets des Sauvages : le bouillon du pot leur sert de boisson. Le pain se mange icy avec la viande , & avec les autres mets : si vous en donnez aux Sauvages , ils en feront vn mets à part , & bien souuent le mangeront le dernier. Ils s'accoutument neantmoins petit à petit à nostre façon.

En la pluspart de l'Europe , quand quelqu'un va en visite , on l'inuite à boire : parmi les Sauvages , on l'inuite à manger.

En France. Les bouchers debitent , & vendent leur viande avec les os , & on la sert ainsi dessus la table : parmi nos Algonquins , les bouchers & les boucheres , qui sont quasi en aussi grand nombre , qu'il y a d'hommes & de femmes , habillent si adroitement vn animal , que les os demeurent separez de la pluspart de la chair. Ils ne laissent pas de faire bouillir tout ensemble : mais la viande se presente aux festins , & on donne les os à examiner , aux domestiques de celuy qui fait le festin. Quand on les a bien sucez , &

bien rongez, on ne les donne pas aux chiens, comme on fait en France; ce seroit vn grand mal: pource, disent-ils, que les animaux se rendroient bien plus diffieiles à prendre, receuant auis de leurs freres, & de leurs semblables, qu'on donne leurs os aux chiens. C'est pourquoy ils iettent au feu, ou dans la riuiera, ou bien ils enterrent les os du castor, de peur que les chiens n'en approchent. Pour les bestes qui n'ont point d'esprit, c'est à dire, qui se laissent prendre aisément, ils méprisent leurs os, les iettant à leurs chiens. Ceux qui sont maintenant instruits, se moquent de ces superstitions & de ces réueries.

Si les Sauvages ne sont à la chasse, ou en voiage, leur posture ordinaire est d'estre couchez, ou assis à terre: ils ne scauroient demeurer debout; les iambes, disent-ils, leur enflent incontinent. Ils haïssent les sieges plus releuez que la terre: les François tout au contraire, se seruent de chaires, de bancs, ou d'escabeaux, laissant la terre, & la litiera aux bestes.

Vn bon danseur, en France, n'agite



pas beaucoup ses bras, il tient le corps droit, remuë les pieds si lestement, que vous diriez qu'il dedaigne la terre, & qu'il veut demeurer en l'air : les hommes Sauvages au contraire, se courbent dans leurs danſes ; ils pouſſent & remuënt leurs bras avec violence, comme s'ils vouloient paistrir du pain : ils frappent la terre des pieds ſi fortement, qu'on diroit qu'ils la veulent ébranler, ou enfoncer dedans juſques au col.

Ceux qui venant de la ville quittent leur ſouliers, les mettent en quelque lieu bas, & écarté : les Sauvages les pendent au plus haut lieu de leurs cabanes pour les faire ſecher.

En France. On porte les enfans ſur le bras, ou ſur la poitrine. En Canadas, les meres les portent derriere leur dos. On les tient en France le mieux couverts qu'on peut : là ils ſont le plus ſouuent nuds comme la main. Leur berceau, en France, demeure à la maiſon : là, les femmes le portent avec leurs enfans : auffi n'eſt-il compoſé que d'une planche de cedre, ſur lequel le pauvre petit eſt lié comme vn fagot.

En France. Vn Artisan n'attend point son paiement, qu'il ne reporte sa besogne : les Sauvages le demandent par auance.

En France. On ne se plaist pas beaucoup de voir tomber de la neige, ou de la gresle : c'est ce qui fait sauter d'aïse les Sauvages.

Ceux qui nauigent dans les vaisseaux d'Europe, descendent aux fond quand il pleut : les Sauvages au contraire, pour éuiter la pluie, se mettent à terre, renuersant sur eux, & sur leur bagage leur petit nauire.

Quand vn Sauvage prend vn outil pour doler du bois, ou vn couteau pour couper quelque chose, il porte la main & le tranchant tout au contraire d'vn François : l'vn le porte en dedans, l'autre en dehors.

Les Européens ne font point de difficulté de dire leurs noms, & leurs qualitez : vous faites vne confusion à vn Sauvage de luy demander son nom : si bien que si vous luy demandez comme il s'appelle, il dira qu'il n'en sçait rien, & fera signe à vn autre de le nommer.

128 *Relation de la Nouvelle France,*

En France. Vn pere mariant sa fille, luy assigne vn dot. Là, on donne au pere de la fille.

En Europe, les enfans heritent de leurs parens : parmy les Hurons, les neveux du costé de la sœur, succedent à la charge de leurs oncles ; & les petits biens des Sauvages se donneront plustost aux amis du defunt, qu'à ses enfans. Cette coustume qui n'est pas mauuaise estant bien expliquée, se garde encore en quelques endroits de l'Inde Orientale.

En France. L'homme emmene, pour l'ordinaire, la femme qu'il épouse, en sa maison : là, l'homme va demeurer en la maison de la femme.

En France. Si quelqu'un se met en colere, s'il a quelque mauuais dessein, s'il machine quelque mal, on l'iniurie, on le menace, on le chastie : là, on luy fait des presens, pour adoucir sa mauuaise humeur, & pour guetir sa maladie d'esprit, & pour reprendre de bonnes pensées. Cette coustume, dans la sincerité de leurs actions, n'est pas mauuaise : car si celuy qui est en colere, ou qui machine quelque mal, estant



és années 1657. & 1658. 119

estant offensé touche ce present, sa colere, & son mauuais dessein est effacé de son esprit en vn moment.

En vne bonne partie de l'Europe, on s'est ietté dans vn tel excés de ceremonies, & de complimens, que la sincerité en est bannie. Là tout au contraire, la sincerité est toute nuë: si son fruit estoit abrié de quelques feuilles, l'arbre en seroit plus beau. Au bout du compte, il vaut mieux viure avec franchise, & iouir de la verité, que de se repaistre de vent, & de fumée, sous des offres de seruices, remplies de mensonge:

*Namque magis natura placet, fucum odimus omnes.*

En Europe. On oste aux morts tout ce qu'on peut, on ne leur donne que ce qui est necessaire pour les cacher, & pour les éloigner de nos yeux. Les Sauvages tout au contraire, ils leurs donnent tout ce qu'ils peuuent, ils les oignent, & les habillent, comme s'ils alloient aux nopces, enterrant avec eux tout le bagage qu'ils aimoient.

Les François sont étendus tout do leur long dans leurs sepulchres: les Sau-

uages en enseueliffant leurs morts, leur font tenir dans le tombeau, la posture qu'ils tenoient dans le ventre de leurs meres. En quelques endroits de la France, on fait tourner la teste au mort, du costé d'Orient: les Sauvages luy font regarder l'Occident. l'ay veu de nouveaux Chrestiens enterant vn mort, disposer la fosse, en sorte que la teste regardast vers l'Autel de l'Eglise, & cela par deuotion.

---

*Quelques nouvelles arriuées par le dernier vaisseau.*

#### CHAPITRE VIII.

**V**Ous aurez remarqué cy-dessus, au Chapitre second, comme nos Peres, & nos François se retirerent de leur habitation bastie sur les riués du lac Gannantaa, voisin d'Onnontagué. Cela se fit la nuit, & sans bruit, & avec tant d'adresse, que les Iroquois, qui cabanoient aux portes de nostre maison, ne s'apperceurent iamais du transport des canots, & des

batteaux, & du bagage qui fut mis à l'eau, ny de l'embarquement de cinquante trois personnes. Le sommeil, dans lequel ils estoient profondement ensevelis, après auoir bien chanté, & bien dansé, leur déroba cette connoissance; mais enfin la nuit ayant fait place au iour, les tenebres à la lumiere, & le sommeil au réueil, ces Barbares sortirent de leurs cabanes, & se pourmenant à l'entour de nostre maison bien fermée à clef, s'estonnoient du grand silence des François. Ils ne voioient sortir personne pour aller au trauail, ils n'entendoient aucune voix. Ils creurent au commencement qu'ils estoient tous en prieres, ou en conseil; mais le iour s'auançant, & ces prieres ne finissant point, ils frapperent à la porte. Les chiens, que nos François auoient laissez à dessein, leur répondent en iappant. Le chant du coq qu'ils auoient entendu le matin, & le bruit de ces chiens, leur fit penser que les maistres de ces animaux n'estoient pas loin, ils rentrent dans la patience qui leur échappoit; mais enfin le Soleil commençant à descendre, &



personne ne répondant, ny aux voix des hommes, ny aux cris des bestes, ils escaladent la maison pour voir en quelle posture estoient nos gens, dans cét epouuantable silence. C'est icy que l'étonnement se change en effroy, & en trouble. Ils ouuurent la porte, les principaux entrent par tout, on monte au grenier, on descend dans les caues, & pas vn François ne paroist, ny vif, ny mort. Ils se regardent les vns les autres; la peur les saisit; ils croient qu'ils ont affaire à des demons. Ils n'auoient veu aucun bateau, & quand mesme ils en auroient veu, ils ne s'imaginoient pas que nos François fussent si temeraires, que de se precipiter dans des courans, dans des brisans d'eau, dans des rochers, dans d'horribles dangers, où eux mesmes, quoy que tres-habiles à passer par ces faults & par ces cascades, y perdent souuent la vie. Ils se persuadent ou qu'ils ont marché sur les eaux, ou qu'ils ont volé par l'air, ou plustost, ce qui leur sembla plus probable, qu'ils s'estoient cachez dans les bois. On les cherche: rien ne paroist. Ils tiennent

quasi pour assuré qu'ils se sont rendus inuisibles ; & comme ils ont disparu tout à coup, qu'ils viendront fondre tout à coup sur leurs Bourgades. Cette retraite miraculeuse dans leur esprit, leur fit voir que nos François auoient connoissance de leur trahison ; & la conscience de leur crime & des meurtres qu'ils vouloient commettre, les ietta bien auant dans la terreur. Ils font garde par tout. Ils sont en armes iour & nuit, s'imaginant à toute heure que la foudre & la vengeance des François iustement irritez, alloit fondre sur leurs testes.

Enfin, voyant que rien ne paroiffoit, que tout rouloit en leur pais à l'ordinaire, ils enuoient de leurs troupes vers les François, les vnes en guerre & les autres comme des Ambassadeurs, pour sçauoir des nouuelles de leurs hostes, & pour tascher de retirer de nos mains leurs compatriotes mis aux fers.

J'apprends que ceux qui sont venus en armes, ont esté mal traitez, & qu'on a retenu ces feints Ambassadeurs. Nous sçaurons vne autre année le dé-

134 *Relation de la Nouvelle France,*  
tail de tous ces rencontres & de toutes ces intrigues. Je ne dis seulement qu'en passant & en gros, ce que j'ay appris de ceux qui sont retournez de ce nouveau monde par les derniers vaisseaux.

Ils adioustent, qu'il court vn bruit dans ce pais là, que tous les Europeans qui habitent cette longue coste qui regne depuis l'Acadie iusques à la Virginie, irritent contre les Iroquois ennemis communs de toutes les Nations, se veulent lier ensemble pour les détruire: *Non vult Deus mortem peccatoris, sed magis vt conuertatur & viuat.* Je ne souhaite pas la ruïne de ce peuple, mais bien sa conuersion.

On m'assure encore qu'il y a quantité d'Agneronnons, d'Onnontagueronnons, d'Oneiotchronnons prisonniers à Kebec, aux trois Riuieres & à Montreal. Que ces peuples viennent de tous costez solliciter Mons. le Vicomte d'Argençon Gouverneur du pais, de les mettre en liberté: & comme il est homme sage & prudent, on dit qu'il ne veut point lascher prise, que ces Barbares n'amènent les enfans




des principaux du païs, qu'on tiendra dans des Seminaires bien fermez, qu'on élèuera en la foy Chrestienne, & qui serviront d'hostages aux François, contre les courses & contre les entreprises de ces Barbares, qui n'ont autre loy que celle de leur interest.

Voicy encore vne autre bonne nouvelle & bien certaine. Les Algonquins des païs plus hauts, dont nous auons parlé cy-dessus, ont enuoié quelques canots chargez de pellerterie vers les François, avec parole de venir au nombre de cinq cent hommes l'an prochain, equippez en guerre & en marchandise. Ils souhaitent des Peres de nostre Compagnie, pour aller porter la foy dans leur païs, & dans ces grandes Nations, dont nous auons fait mention. Si le Demon ferme vne porte, Dieu en ouure vne autre. On écrit qu'il se prepare déia de braues ouuriers, pour porter l'Etendart de IESVS-CHRIST dans ces vastes contrées: *fat, fiat*. Pour conclusion, ie diray en finissant cette Relation, que nonobstant les guer-


136 *Relation de la Nouvelle France,*  
res, les tempestes & les afflictions  
du pais, on a baptisé en diuers en-  
droits environ neuf cent Sauvages  
cette année.

F I N.









EA659

R382d













HT